

Apocalipsis

Bèlua'alú tubi ianglè lu Juan

1 La'ni librè rè' caquëa'a shcuendè tubi cusè nabè'nè Dios. Bèdè'è mè permisi shini mè Jesucristo tè guèlua'alúhi' luhia, Juan, tè gac bè'a ra muzè shtë mè ra cusè naguër gac nasesè. Bèshe'ldè mè tubi ianglè tè gac bé'ahia di'dzè rè'. ²Quëadi'dza di'dzè rè' na verdá shtë Dios nu Jesucristo biadí'dzi' di'dzè rè' na verdá, grè lo què nagunahia.

³Guëquitè ldu'u el què nagu'ldè con voz fuertè, nu guëquitè ldu'u ra el què naguëqué diagüè ra di'dzè rè' nabèdchini de Dios. Guëquitè ldu'u ra nagunè cuendè grètè' lo què naqué la'ni librè rè' purqué lè'è iurè hia ze'dè guèdchini parè gac cumplir di'dzè rè'.

Juan bëquë'è ra cartè lu ra shmènè Dios naquèrèldè Asia

⁴Na Juan quëquëa'a di'dzè rè' lu tè naná grupè shtë shmènè Dios, lu tè naquèrèldè regiuni Asia. Gulè bè'nè recibir bendición nu gulè cuedchí ldu'u tè. Dios na el què nabani iurne', el què nanápèdi'i fin, el què naze'dè guèdchini. ⁵Nu gulè bè'nè recibir bendición shtë

Jesucristo, testigu naruadi'dzè verdá. Guc mè primèrè nagueashtë ladi ra tégulè nu napè mè pudèrè subrè grè ra rëy naná rnibè'a lu guédchiliu rè'. Cristo rac shtu'u mè lè'è hia'a nu bëzuné mè lè'è hia'a de grè duldè con prupi rënë shtë mè. ⁶Bè'nè mè lè'è hia'a ziquè rëy tè guëribè'a hia'a con lè'è mè, nu bè'nè mè lè'è hia'a ziquè bëshuzi tè guédè'na'a sirvè lu Dios, Shtadè mè. Gulè bèdè'è hunurè nu graci parè lè'è mè, el què narnibè'a parè siemprè. Amén.

⁷Gulè guná, Cristo guèdchini rua' shcahi. Grètè' mènè guená rall lúhi' hashtë ra naná gudini lè'è mè. Nu grètè' mènè shtë guédchiliu, demasiadè gu'nè rall iurè guená rall lu mè purqué rdzèbè rall cashtigu naze'dè. Zni gaquin. Amén.

⁸“Nahia principi nu fin ziquè ra lètrè A nu Z”, rni'i Dadè, el què narnibè'a grètè' cusè, el què natsalúdi'i, el què nanabani iurne', el què naze'dè guèdchini nasesè.

Bèlua'alú Cristo lu Juan con pudèrè shtëni'

⁹Na Juan, nahia sa' tè; juntè quédè'na'a sufrir. Rzunaldè mènè lè'è hia'a purqué rialdí ldu'u hia'a

shti'dzë Jesucristo. Guna'bë më lë'ë hia'a parë gua'a ldu'u hia'a cusë durë con pacënci nu parë guëñib'ë hia'a con lë'ë më. Nanúa prësi lugar lë Patmos, tubi dani la'ni nisë, purquë biadi'dza shti'dzë Dios nu guca testigu shtë Jesucristo. ¹⁰Guzac tubi dzë, primërë dzë shtë lmalë, quëbezënúa Espíritu Santo nu quëgséhi' na. Binia tubi bë fuertë nezë tēcha naguni'i cumë ziquë cha' trompetë; ¹¹Ni guni'i' lua:

—Na nahia principi nu nahia lúltimë ziquë lëtrë A nu Z. Bëquë'ë la'ni tubi librë lo quë narnal nu bëshé'ldëhin lu ra grupë shtë shmënë Dios naquërelde guë'dchi Efeso, nu Esmirna, nu Pérgamo, nu Tiatira, nu Sardis, nu Filadelfia, nu Laodicea.

¹²Bëabría parë nezë tēcha të guënahia nia chu naná quëgni'i. Iurë bëna zni, gunahia lu gadchi gandelier orë. ¹³Guëláu ra gadchi gandelier, gunahia nga'li zuga'a tubi ziquë nguiu nabëshé'ldë Dios. Nácui' tubi lari llëduni; bēdchinin hashtë guëa' më. Nu nápi' tubi cinturón shtë orë dēdë laguë ldu'u më. ¹⁴Guitsë guëc më naquichin ziquë guitsë ladi lli'li naquichi u ziquë naquichi ziquë nievë. Slúhi' rabtsë'ë ziquë tubi be'lë. ¹⁵Guëáhi' rabtsë'ë cumë ziquë gui'bë shlí'echi naguër bëzunë luhin u ziquë gui'bë nabëru'u la'ni hiurnë. Nu cháhi' na fuertë cumë ziquë nisë nardēdë la'ni zihani guë'gu. ¹⁶Hia guiá'ai' ladë ldi nanú gadchi mbelëgui'i nu ruáhi' bëru'u tubi spadë dushë nanapë chupë lúhi'. Lu më na ziquë lu ngubidzë iurë lë'ë ngubidzë rabtsë'ë guëdubi fuersë shtëhi'.

¹⁷Iurë gunahia lu më, bēzullibia lu më nu bëana ziquë tēgulë. Perë lë'ë më bēdchi'bë guia'a ladë ldi guëca nu guni'i' më:

—Adë rdzébēdi'il. Nahia principi nu adë nápēdia'a fin. ¹⁸Nahia el quë nanabani; gutia perë iurne' nabanian parë siemprë. Nuá'ahia liahi narunë significar pudërë nanapa subrë galguti eternë nu subrë lugar catë cuezë ra tēgulë. ¹⁹Bëquë'ë iurne' lo quë nagunal, lo quë nananú iurne' con lo quë naguër gac. ²⁰Ndë'ë na lo quë narunë significar ra gadchi mbelëgui'i naná gunal guiahia ladë ldi con ra gadchi gandelier shtë orë. Ra gadchi mbelëgui'i runë significar gadchi encargadë shtë ra gadchi grupë shtë shmënë Dios, nu ra gadchi gandelier runë significar gadchi grupë rë'.

Cartë parë ra shmënë Dios naquërelde Efeso

2 Bëquë'ë tubi cartë nu bëshé'ldëhin lu encargadë shtë ra grupë shtë shmënë Dios guë'dchi Efeso. Guni'i': "Ndë'ë rni'i el quë nanapë gadchi mbelëgui'i guia'a ladë ldi, nu naná zuga'a guëláu gadchi gandelier orë. ²Nanëa grëtë' lo quë naquëhunë të; rac bē'ahia de quë adë rdé'ēdi'i të lugar parë ra mēnē mal. Nu nanëa de quë bēdchi'bë të prēbē lu ra naná rni'i na rall poshtë shtë Jesús perë adë nádi'i rall poshtë. Grëtë' rall bēgú të shlatë de quë na rall bishi. ³Na të më pacënci nu guzac zi të por diza'quë nu nalé bē'nē të cumplir ordë shtëna sin adë riá sháquēdi'i ldu'u të. ⁴Perë napa tubi cusë cuntrë lë'ë të de quë adë

rac shtú'udi'i të Jesús ziquë antsë.
⁵Por ni gulë bësëagná ldu'u të catë bëniti të nu gulë bënë cambi mudë nanabani të nu gulë bënë ziquë bënë të iurë gualdí ldu'u të diza'quë. Si talë adë gúnëdi'i të cumplir di'dzë rë', guna cashtigu lë'ë të. Guëdchisúa gandelier entrë lë'ë të si adë gúnëdi'i të cambi mudë nanabani të. ⁶Sin quë adë guëtë'dëdi'i, napë të tubi cusë favurë de lë'ë të naná rna tushë të lo quë narunë ra nicolaítas. Nu zac na rna tusha lu ra enseñansë ni. ⁷El quë nardë'ë cuendë di'dzë rë', gulë bëqué diaguë bien lo quë narni'i Espíritu lu ra grupë shtë shmënë Dios. Grétë' el quë nangunë gan lu ra cusë mal, guëdë'a gaull ra nashi shtë hiaguë nazubëga'a paraíso shtë Dios. Guëbani rall parë siemprë."

**Cartë parë grupë shtë shmënë
 Dios naquërelde Esmirna**

⁸Bëquë'ë tubi cartë nu bëshë'ldëhin lu naná encargadë shtë shmënë Dios naquërelde Esmirna. Bëquë'ë zni: "Ndë'ë rni'i el quë naná principi, el quë nápëdi'i fin, el quë naguti perë bëabrí nabáni'. ⁹Nanéa grë lo quë naquëhunë të; rac bë'ahia grë galërzac zi shtë të. Nanéa blac prubi na të perë de vërë na të ricu. Nu nanéa lla ruadi'dzë mënë mal cuntrë lë'ë të, mënë narni'i na rall mënë israelitë perë bishi rall; na rall shmënë Satanás. ¹⁰Adë rdzëbëdi'i të lo quë narzac zi mënë lë'ë të. Lë'ë mëdzabë guëtiá'all sëbëldá të lachigui'bë të parë grétë' tédë të lu prëbë. Lë'ë të napë quë sac zi të durantë chi'i dzë perë gulë tsagla'guë gac të firmë

hashtë galguti, iurní guënehia vidë sin fin naná guëlua'a ziquë tubi corunë shtë rëy. ¹¹El quë narac bë'a ra di'dzë rë', gulë bëqué diaguë lo quë narni'i Espíritu lu ra shmënë Dios. El quë nangunë gan lu cusë mal, adë tsádi'll lu cashtigu eternë."

**Cartë parë grupë shtë shmënë
 Dios naquërelde Pérgamo**

¹²Bëquë'ë tubi cartë nu bëshë'ldëhin lu naná encargadë shtë shmënë Dios naquërelde guë'dchi Pérgamo. Bëquë'ë zndë'ë: "Ndë rni'i el quë nanapë spadë dushë naná chupë téchi'. ¹³Na nanéa grétë' lo quë naquëhunë të nu nanéa de quë nabani të catë quëgnibë'a Satanás perë ziagla'guë të firmë lu nezë za'quë. Nunquë adë bësá'nëdi'i të parë tsaldí ldu'u të shti'dza, ni siquierë la'ni dzë iurë lë'ë Antipas, tubi testigu za'quë shtëna, gúti'. Ra mënë gudini rall lë'i' mërë lugar catë quërelde Satanás. ¹⁴Perë napa tubi cusë cuntrë lë'ë të de quë nga'li Pérgamo nanú mënë adë rsá'nëdi'i rall enseñansë shtë Balaam. Balaam bédë'ë cunseju parë Balac naná bësini ra mënë israelitë lu duldë. Bënë rai' duldë; gudáu rai' belë naná bënë mënë ofrer lu ra dzanë ídolo, nu cuënú rall sa' rall. ¹⁵Nu zac napë të ra naquërelde nga'li, mënë narianaldë ra enseñansë shtë mënë nicolaítas, cusë narná zá'quëdia'a lúhi'. ¹⁶Por ni gulë bënë cambi mudë nanabani të; si no, guelda lueguë nu tildinúa lë'ë të ziquë tubi nanua'a spadë dushë naná rru'u ruahia. ¹⁷El quë narac bë'a shti'dza, gulë bëqué diaguë lo quë narni'i Espíritu lu

ra grupë shtë shmënë Dios. El quë nangunë gan lu ra cusë dzabë ni, guëdë'a tubi guetështildi maná gaull; guetështildi ni nanú naga'chi. Nu guëdë'a tubi guë'ë naquichi; lu guë'ë ni naescrihtë tubi lë cubi. Ni tubi chu adë runguë bé'adi'i lë ni sino sulë el quë nangunë recibirin."

**Cartë parë grupë shtë shmënë
Dios naquërelde Tiatira**

¹⁸Bëquë'ë tubi cartë nu bëshë'ldëhin lu naná encargadë shtë shmënë Dios naquërelde Tiatira. Zni guni'i: "Rni'i shini Dios, el quë nanapë slúhi' ziquë llini shtë be'lë nu guëáhi' na ziquë gui'bë shlí'echi naguër bëzuné. ¹⁹Na nanéa grëtë' lo quë naquëhunë të; nanéa de quë rac shtu'u sa' tē nu rialdí ldu'u tē shti'dzë Dios; nu nanéa más bë'në tē iurne' quë antsë iurë gualdí ldu'u tē shti'dzë më. ²⁰Perë napa tubi cusë cuntrë lë'ë tē, de quë quëhunë tē permitir quërelde tubi mënë naná ziquë na'a Jezabel ladzë tē. Rní'ill de quë ruadí'dzëll shti'dzë Dios perë quëgsiguëll lë'ë shmëna con enseñansë shtë'nëll. Rluá'all de quë nádi'i mal quënú mënë tse'lë sa' rall nu gau rall belë nabëdë'ë mënë ziquë ofrendë parë ra dzanë ídolo. ²¹Na bënë'a tubi tiempë Jezabel parë guëabrí ldú'ull con Dios, perë nédi'ill gúnëll cambi mudë nanabánill, nu adë nédi'ill guësá'nëll vidë mal. ²²Iurne' guëshe'lda tubi cashtigu parë mënë ni; guëru'lda lë'ëll lu camë con dulurë. Grë ra nanédi'i guëabrí ldu'u rall lu Dios, ra nabë'në mal con lë'ë na'a ni, gunë rall sufrir demasiadë. ²³Nu tsatinia

ra shini na'a ni; gati rall. Zni grë ra shmënë Dios guëdë'ë rall cuendë de quë na rac bé'ahia hashtë grë ra shgabë mieti, grëtë' lo quë nanú la'ni ldu'u mieti, nu guënehia tubi cashtigu cadë tubi de lë'ë tē según obrë nabë'nëll. ²⁴Perë los de más lë'ë tē naquërelde Tiatira, lë'ë tē nanédi'i tsagla'guë ra enseñansë shtë Jezabel, lë'ë tē nanadë bënguë bé'adi'i ra enseñansë mal, cusë narni'i rall nahin secretë shtë Satanás, pues rnía'a lu tē de quë adë guëdchí'bëdia'a stubi carguë guëc tē. ²⁵Sulamëntë gulë bë'në cumplir lo quë nagunia'a lu tē; adë guëazë guëtëdi'i tē. Guelda stubi. ²⁶Grëtë' el quë nangunë gan lu mal nu tsagla'guë gúnëll lo quë narac shtua'a hashtë fin, na guënehia pudërë parë guëribë'a mënë ni ra naciuni. ²⁷Ziquë bëne'e shtada pudërë parë guëribé'ahia, zni guëribë'a rall ra naciuni con varë gui'bë. Gapë rall derechë ziquë el quë naruntsa'u trashtë shtë guiu'u; guëllul ra trashtë nanadë rlluí'di'i. ²⁸Nu zac guënehia llini la'ni ldu'u rall, llini ziquë mbelëgui'i nalë Plojë. ²⁹El quë narac bë'a shti'dza, gulë bëquë diaguë ra di'dzë narni'i Espiritu lu ra shmënë Dios."

**Cartë parë grupë shtë shmënë
Dios naquërelde Sardis**

3 Bëquë'ë tubi cartë nu bëshë'ldëhin lu naná encargadë shtë shmënë Dios naquërelde guë'dchi Sardis. Zndë'ë bëquë'ë: "Ndë'ë rni'i el quë nanapë ra gadchi espíritu shtë Dios nu gadchi mbelëgui'i; nanéa grëtë' lo quë naquëhunë tē nu na rdë'a

cuendë de quë na të ziquë naguti
 aunquë rni'i mieti napë të famë
 de quë nabani të. ²Gulë bêtë'tsë
 mbëca'ldë lu të nu gulë bëdë'ë
 fuersë ra cusë nanapë të perë hia
 mërë rialú rahin. Pues gunahia
 lo quë naquëhunë të; nádi'in cusë
 za'quë delantë lu Dios shtëna. ³Gulë
 bësëagná ldu'u të ra enseñansë
 nabë'në të recibir; gulë tsagla'guë
 tëchi rahin nu gulë bënë cambi
 mudë nanabani të. Si talë adë
 rdë'edi'i të cuendë shti'dza, guelda
 lueguë ziquë ridë tubi nguba'në
 sin quë adë guëdë'edi'i të cuendë
 ca iurë guelda. ⁴Sin quë adë
 guëtë'dëdi'i, nanú bëldá mënë
 naquërelde guë'dchi Sardis, adë
 quërëldëdi'i rall mal lu ra duldë;
 pues lë'ë rall sunú rall na; gacu rall
 con lari naquichi purquë zni runë
 tucarë lë'ë rai'. ⁵Ra nagunë gan lu
 mal, ni gacu rall lari naquichi nu
 jamás adë guëtí'idia'a lë rall la'ni
 librë shtë vidë sino gunguë bé'ahia
 ra mënë ni delantë lu Shtada nu
 delantë lu ra ianglë. ⁶El quë nardë'ë
 cuendë shti'dza, gulë bëquë diagüë
 lo quë narni'i Espiritu lu ra grupë
 shtë shmënë Dios.”

**Cartë parë grupë shtë shmënë
 Dios naquërelde Filadelfia**

⁷Bëquë'ë tubi cartë nu
 bëshë'ldëhin lu ra shmënë Dios
 naquërelde Filadelfia. Zni bëquë'ë:
 “Ndë'ë rni'i el quë naná santu nu
 náhi' verdá, el quë nanapë liahi
 shtë rëy David, el quë iurë rshá'li',
 ni tubi adë chu gunë gan guësë'au,
 nu iurë lë'i' rsé'auhi', ni tubi adë
 chu gunë gan guëssha'lë. ⁸Na rac
 bé'ahia grëtë' lo quë naquëhunë

të, nu na zuhia tubi puertë nalla'lë
 delantë lu të. Ni tubi chu adë gunë
 gan guësë'au puertë ni. Aunquë
 du'psë rialdí ldu'u të shti'dza,
 quëhunë të cuendë diza'quë shtëna
 nu adë bënëdi'i të negar na të
 shmëna. ⁹Guná, lo quë nagac. Por
 fuersë shtëna guna de quë ra mënë
 narianaldë tëchi ra enseñansë
 shtë Satanás, ra narni'i na rall më
 israelitë perë bishi rall; nádi'i rall
 më israelitë. Perë guna të guëzullibi
 rall lu të; gac bë'a rall de quë na
 të shmëna; gac bë'a rall de quë rac
 shtua'a lë'ë të. ¹⁰Bënë të cumplir
 mandamientë shtëna, na të më
 pacënci; por ni gapa lë'ë të tiempë
 durë shtë prëbë parë grë mënë
 narëta' lu guë'dchiliu. Guëtëde
 prëbë parë lë'ë rall. ¹¹Guelda
 nasesë. Gulë gupë bien lo quë naná
 rialdí ldu'u të, të parë ni tubi adë
 chu guëdchisúdi'i premi narunë
 tucarë ca'a të. ¹²Ra nagunë gan
 lu ra cusë durë ni, na guna lë'ë
 rall ziquë pilari la'ni iádu'u shtë
 Dios gube'e. Nunquë jamás adë
 guërú'udi'i rall nga'li. Nu guëquëa'a
 lë Dios shtëna luquë rall. Nu
 guëquëa'a lë ciudá naná ciudá shtë
 Dios shtëna. Lëhin na Jerusalén
 cubi nu ze'dë guëdchinin de gube'e
 catë quëbezë Dios shtëna. Nu zac
 guëquëa'a tubi lë cubi shtëna luquë
 ra mënë ni. ¹³El quë nardë'ë cuendë
 shti'dza, gulë bëquë diagüë lo quë
 nacagni'i Espiritu lu grupë shtë
 shmënë Dios.”

**Cartë parë grupë shtë shmënë
 Dios naquërelde Laodicea**

¹⁴Bëquë'ë tubi cartë nu
 bëshë'ldëhin lu grupë shtë shmënë

Dios naquëreldë guë'dchi Laodicea. Zni bëquë'ë: "Ndë'ë rni'i el quë naná verdá, el testigu verdaderë, el quë naná bëcueshtë grë cusë según voluntá shtë Dios. Rni'i më ni: ¹⁵Na rac bé'ahia grétë' lo quë naquëhunë të. Rac bé'ahia de quë adë rac shtú'udi'i të Dios con guëdubínú ldu'u të. Ojalá niac shtu'u të Dios ¹⁶perë cumë ziquë iurne' na të ziquë nisë nanadë náldëdi'i, nilë naldëdi'i. Por ni rdchibë ldua'a lë'ë të. ¹⁷Pues rni'i të na të ricu, de quë bien ziazú të. Rni'i të ni tubi cusë runë fáltëdi'i, perë adë rac bé'adi'i të na të ziquë tubi nanadë pë nápëdi'i. Nápëdi'i të vidë eternë; na të prubi demasiadë; na të ciegu; adë riasëdi'i të. Na të ziquë nanápëdi'i shábi'; guëtú lu të lu Dios. ¹⁸Por ni rnehia cunseju parë lë'ë të de quë guëzi'i të orë shtëna, u sea gulë guna'bë lua vidë cubi nadë rialúdi'i të gáquël ricu de verdá. Gulë guzi'i lari naquichi, u sea gulë guna'bë lua të gac limpi ldú'ul të adë guëtúdi'i lul. Gulë guzi'i rumëdi parë tsa slu të, u sea gulë guna'bë lua llni të tsasël shti'dza. ¹⁹Rni'inúa lë'ë të; rzu za'ca lë'ë të lu shnezë Dios purquë rac shtua'a lë'ë të. Por ni rqui'ni gapë të más ánimo nu guëabrá ldu'u të lu Dios. ²⁰Guná, na zua rua' ldu'u nguui; cagna'ba. Si talë rínil shti'dza nu guëshá'lël rua' ldú'ul, guëdchinia të parë cuezënúa lél'el; guadi'dzënuál. Nu lél'el guadi'dzënuál na. ²¹Grétë' el quë nangunë gan lu mal, guëdë'a tubi lugar cula'ni catë cueza, catë rnibé'ahia. Zni bëna gan nu quëbezënúa Shtada catë rnibë'a më. ²²El quë rac bë'a shti'dza, gulë

bëquë diaguë lo quë narni'i Espíritu lu grupë shtë shmënë Dios."

**Ra nanabani gube'e quëhunë
rai' adorar Dios**

4 Despuësë de gunahia ra cusë rë', gunahia tubi puertë nalla'lë gube'e; nu binia tubi bë ziquë cha' trompetë. Ni na el mizmë naguni'i lua antsë. Guní'i lua:

—Güe'pi ndë'ë të parë guëluá'ahia lul grétë' ra cusë nanapë quë guër gac.

²Mizmë iurní pudërë shtë Espíritu Santo gulezënuhi' ldua'a. Gunahia tubi trunë naquëbezë gube'e; hia lu trunë ni zúbëga'a tubi nazubë luhin. ³Bëluá'ahi' ziquë tubi guë'ë jaspe narabtsë'ë u ziquë guë'ë cornalina. Hia alreduerë lë'ë trunë, zuga'a tubi iarcu iris narabtsë'ë ziquë tubi guë'ë esmeralda. ⁴Alreduerë shtë trunë ni gunahia galdë bi tapë trunë; hia lu ra trunë ni zúbëga'a galdë bi tapë më guani'si; nacu rai' lari naquichi con corunë orë naná guëc rai'. ⁵De lu trunë bëru'u ziquë ray shtë nguizi'u; ribé con ruidë shtë nguizi'u. Delantë lu trunë rie'qui gadchi grëaguë; rru'u be'lë lu rai'. Ni na gadchi Espíritu shtë Dios. ⁶Nu delantë lu trunë ni nanú tubi cusë ziquë nísëdu'u narlua'a ziquë vidrio u ziquë guë'ë'guë.

Guëluá lugar ni nu alreduerë lë'ë trunë, zuga'a tapë naná ziquë rlua'a ra ma. Napë ma slu ma guërüpë tēchi. ⁷Primërë ra nanabani ni rlua'a ziquë tubi león; hia nachupë rlua'a ziquë tubi ngunë; hia natsunë nápi' tubi lu nguui; hia natapë rlua'a ziquë mbisiá nariasë. ⁸Ra guëzá

tapë nanabani, ni napë rai' shu'pë shcuágui' cadë tubi rai'. Nu nanú slu rai' guëdubi tēchi, tēchi fuërē nu tēchi nezē la'ni. Nu dzē la gue'lē nunquē adē rbézēdi'i rai' rni'i rai':

Santu, santu, santu, na Dadē
Dios narnibē'a grētē' cusē,
el quē nanapē principi; nabáni'
iurne', nu adē nídí'i fin parē
lē'i'.

⁹Cadē vēsē lē'ē ra nanabani ni quēhunē rai' adorar, bēdē'ē rai' graci lu mē naquēbezē lu trunē, el quē nadē tsalúdi'i. ¹⁰Ra galdē bi tapē mē guani'si bēzullibi rai' delantē lu mē nazubē lu trunē nu bē'nē rai' adorar lē'ē mē nanabani parē siembrē. Bēdchi'bē rai' corunē shtē rai' delantē lu mē ziquē sēñi na mē Rēy shtē rai', nu guni'i rai':

¹¹Dadē Dios shtē na'a, nal mē za'quē.
Sulē lē'ēl nápēl derechē gunē mieti adorar;
gunē mieti alabar. Sulē lē'ēl runē tucarē guēdē'ē mēnē graci purquē lē'ēl bēntsá'ul grētē' ra cusē.
Por voluntá shténēl gurēshtē guédchiliu.

Librē shtē mē nabērulē Lli'li

5 Iurní gunahia tubi librē guia'a ladē ldi shtē mē nazubē lu trunē. Lē'ē librē na ziquē tubi nadu'bi naescritē nezē la'ni nu nezē fuērē nu nē'auhin con gadchi sēgi. ²Nu gunahia ianglē nanapē pudērē ru'bē naná guna'bē di'dzē fuertē:
—¿Chull runē tucarē guēsha'lē librē nu guéchē'zi' sēgi?

³Ni por gube'e, ni por guédchiliu, ni por lugar catē nanú ra tēgulē, ni

tubi adē chu nádi'i parē guēsha'lē librē rē', ni siquierē parē guená ni luhin. ⁴Iurní nalē binia purquē adē chu nádi'i tē guēsha'lē librē ni. Ni tubi adē nídí'i nanapē derechē parē gu'ldē la'ni librē ni nu ni siquierē más zuscē guená ni la'ni librē.

⁵Iurní tubi mē guani'si guní'i' lua:
—Adē rúnēdi'il pues lē'ē nabērulē León shtē llēbní Judá naná ze'dē llēbní rēy David, ni sí, na mē pudēruse. Bē'nē mē gan lu enemigu shtēhi'; napē mē derechē parē guēshá'li' lē'ē librē nu guéchē'zi' ra gadchi sēgi.

⁶Iurní guéláu lē'ē trunē ni nu entrē ladi ra tapē ra nanabani nu ladi ra mē guani'si, gunahia tubi nabērulē Lli'li. Zuldí mē aunquē nilē todavía rluá'aru'u sēñi de quē gúti' ziquē tubi ma nabēdē'ē mēnē cumē ofrendē lu Dios. Nápi' gadchi shcáchi' nu gadchi slúhi'. Ra slúhi' runē significar gadchi espíritu shtē Dios naná bēshe'ldē mē parē guēdubi lu guédchiliu. ⁷Lē'ē Lli'li guna'zi librē nananú guia'a ladē ldi naná quēbezē lu trunē. ⁸Iurē lē'ē mē ni guna'zi librē, guézátē' tapē ra nanabani nu ra galdē bi tapē mē guani'si bēzullibi rai' delantē lu Lli'li. Cadē lē'ē mē guani'si nua'a tubi arpa nu nua'a rai' tubi copē orē naná gadzé gushialē. Gushialē ni na ra oraciuni shtē ra shmēnē Dios. ⁹Nu bi'ldi rai' tubi cantē cubi; guni'i rai':

Sulē lē'ēl runē tucarēl guená'zil librē,
nu guéchē'zēl sēgi rē' purquē gútil
nu con rēnē shténēl gudíllil
prēci parē guc salvar mēnē rē'.

Na rall shini Dios de grë
guë'dchi, grë naciuni.
Ruadi'dzë rall grë clasë dizé;
be'dë guézë rall de guézá
partë shtë gué'dchiliu.

¹⁰ Nu lë'el bënë'el dereché lë'ë rall,
gac rall rëy nu bëshuzi parë
Dios shtë na'a.

Nu guënbë'a rall guëdubi
gué'dchiliu.

¹¹ Despuësë de ni, gunahia nu
binia tubi bë shtë zihani ianglë
naná rëta' alreduerë trunë ni
catë nanú ra nanabani con ra më
guani'si. Cantidá ra ianglë, miles de
lë'ë rai', ¹²guni'i rai' con voz fuertë:

Lë'ë Lli'li naguti, lë'i' runë
tucarë gúni' recibir labansë
shtë mieti; grë mënë guëdë'ë
pudërë shtë rall ca'a më.

Guëdë'ë rall grë riquesë nanapë
rall ca'a më.

Guëni'i rall sulë lë'ë më náhi'
sabi; guëni'i rall llëru'bë na
pudërë shtë më.

Gunë rall honrar lë'ë më; gunë
rall alabar lë'ë më.

Guëni'i rall napë më dereché
parë guënbë'ai'.

¹³ Nu binia cha' grë ra cusë
nabëcueshtë Dios, ra ianglë lu gube'e,
ra mënë narëta' lu gué'dchiliu, hashtë
grë ra mënë naná lugar shtë tégulë nu
la'ni nisëdu'u. Guni'i rai':

Grë mieti gunë alabar lë'i';
guëdë'ë rall grë hunurë.

Guëni'i rai' llëru'bë na pudërë
shtë më.

Labansë ni runë tucarë el quë
naquëbezë lu trunë nu lu Lli'li
parë guëdubi tiempë.

¹⁴ Ra guézá tapë ra nanabani
guni'i rai':

—Nia Dadë. Zni gac.

Ra galdë bi tapë më guani'si
bëzullibi rai' lu më nu bë'në
rai' alabar el quë nanabani parë
siempër.

Ra gadchi sëgi

6 Iurní gunahia lu Lli'li. Iurë
bëché'zi' primërë sëgi, iurní
binia bë shtë tubi ra tapë nanabani.
Cháhi' na ziquë bë shtë nguzi'u;
guní'i':

—Gude'e të guënal.

²Gunahia tubi guay naquichi.
Hia nadchi'bë ma nua'a tubi iarcu
guia'a ni. Iurní bédë'ë rai' tubi
corunë nu ziá'ai' parë gúni' gan lu
enemigu nu parë tsagla'guë gúni'
gan lu rall.

³Iurë lë'ë Lli'li bëche'zë segundë
sëgi, binia bë shtë segundë ra
nanabani; guní'i':

—Gude'e të guënal.

⁴Iurní bëru'u stubi guay naná
color llni. Hia nanadchi'bë ma,
bë'në recibir tubi spadë ru'bë nu
pudërë parë guëdchisull paz parë
ra mënë narëta' lu gué'dchiliu, nu
parë quini ra mënë sa' rall.

⁵Iurë lë'ë Lli'li bëche'zë tecërë
sëgi, iurní binia cha' tecërë nabani;
guní'i':

—Gude'e të guënal.

Gunahia tubi guay nagasë. Hia
nadchi'bë ma, nua'a tubi lliguë
ldibrë guiá'ai'. ⁶Binia tubi bë
nabëru'u guëláu ra nanabani. Guní'i':

—Bë'në dañi hashtë rdu' tubi kilo
shtë trigu por lo quë runë nguui
gan tubi dzë; nu tsunë kilo cebadë
por mizme prëci ni. Perë adë
rúnëdi'il dañi ra hiaguë olivo, nilë
ra hiaguë uvë.

⁷Iurë lë'ë Lli'li bëche'zë cuartë sègi, iurní binia bë shtë cuartë nanabani; guní'i':

—Gude'e të guënal.

⁸Gunahia tubi guay shlí'echi; hia nadchi'bë ma lë Galguti. Hia tëchi de ni ze'dë naldë el quë runë representar lugar shtë ra tëgulë. Iurní lë'ë ni bë'në recibir pudërë subrë guëzátë' cuartë partë shtë mënë narëta' lu guédchiliu të gati rall lu guërru con gubini con galguidzë nu con ma dushë.

⁹Iurë lë'ë Lli'li bëche'zë quintë sègi, iurní gunahia guëa' bëcu'guë ra almë naná guti purquë gualdí ldu'u rai' diza'quë shtë Dios nu purquë guc rai' testigu shtë më lu sa' rai'. ¹⁰Ra mënë ni guni'i rai' fuertë:

—Dadë santu, quëhúnël cumplir promësë shtë'nël. ¿Hashtë ca iurë gac ldé'ël nu gúnël cashtigu ra nagudini lë'ë na'a? ra nanabani lu guédchiliu.

¹¹Iurní bë'në rai' recibir lari naquichi nu repi më të parë guëzi'i ldu'u rai' stu'pë tiempë más, hashtë gac completë número shtë ra bëchi la sa' rai' naná guti por diza'quë shtë Cristo igual ziquë lë'ë rai'.

¹²Iurë lë'ë Lli'li bëche'zë sexto sègi, binia tubi llu ru'bë. Lë'ë ngubidzë bëac ziquë tubi cusë nagasë. Lë'ë mbehu bëac ziquë rënë. ¹³Hia ra mbelëgui'i lu gube'e gulaguë ra hashtë lu guédchiliu cumë ziquë rlaguë nashi bëlda'u iurë lë'ë mbë dushë rni'bi hiaguë ni. ¹⁴Hia gube'e gunitilú ziquë tubi guichi nardëá; hia grëtë' ra dani nu ra dani la'ni nisë bëni'bin shlugarin. ¹⁵Hia ra rëy shtë guédchiliu

bëca'chilú rall la'ni ra cuevë nu entrë ra guë'ë ru'bë shtë guédchiliu. Zni zac bë'në ra mënë narnibë'a, nu ra ricu, nu ra jëfë shtë militar, nu grë ra nanapë pudërë nu autoridá nu ra esclavë con ra nguii naná librë. ¹⁶Guni'i rall lu dani nu lu ra guë'ë:

—Gulaguë guëc na'a të parë guëca'chilú na'a lu më naquëbezë lu trunë. Gulë bëca'chi lë'ë na'a lu cashtigu ru'bë naná guëshe'ldë Lli'li guëc ra mënë.

¹⁷Pues hia lë'ë iurë bédchini, iurë shtë cashtigu ru'bë. ¿Chu gunë gan guëru'u entrë ra cusë ni?

Ra israelitë nanua'a sēni luquē rai'

7 Despuës de ni gunahia tapë ianglë; zuldí rai' guédubi ladë shtë guédchiliu. Quëzudchí rai' guëzá guëdapë mbë të parë adë ldá'adi'i mbë lu guédchiliu, nilë nisëdu'u, nu ni tubi hiaguë shtë guédchiliu. ²Nu zac gunahia stubi ianglë naze'dë nezë guia'a. Nápi' tubi sègi shtë'në Dios nanabani. Lë'ë ianglë guni'i fuertë lu ra guëzá tapë ianglë naná bë'në recibir pudërë parë gunë rai' dañi lu guédchiliu nu nisëdu'u. Guni'i ianglë:

³—Adë rúnëdi'i të dañi lu guédchiliu nu nilë nisëdu'u, nilë parë lu ra hiaguë hashtë guna gan guëquëa'a tubi sēni luquē ra muzë shtë Dios, Shtëda'a.

⁴Binia tubi número naná guc selladë, na rai' ciento cuarenta y cuatro mili shtë ra më israelitë. ⁵Chi'bë chupë mili guc selladë shtë llëbní Judá. Chi'bë chupë mili guc selladë shtë llëbní Rubén. Chi'bë chupë mili guc selladë shtë llëbní

Gad. ⁶Chi'bë chupë mili guc selladë shtë llëbñí Aser. Chi'bë chupë mili guc selladë shtë llëbñí Naftalí. Chi'bë chupë mili guc selladë shtë llëbñí Manasés. ⁷Chi'bë chupë mili guc selladë shtë llëbñí Simeón. Chi'bë chupë mili guc selladë shtë llëbñí Leví. Chi'bë chupë mili guc selladë shtë llëbñí Isacar. ⁸Chi'bë chupë mili guc selladë shtë llëbñí Zabulón. Chi'bë chupë mili guc selladë shtë llëbñí José. Chi'bë chupë mili guc selladë shtë llëbñí Benjamín.

Zihani mënë nagacu lari naquichi

⁹Iurní gunahia zihani mënë naze'dë de grë naciuni nu grë guë'dchi. Gunahia ra naruadi'dzë grë clasë dizé. Zuldí rai' delantë lu trunë nu delantë lu më nabërlulé Lli'li. Pues cantidá rai'; ni tubi adë chu gunë gan guëlabë lë'ë rai'. Nu nacu rai' lari naquichi nu nanú zini guia'a ra mënë ni. ¹⁰Grë rai' guni'i rai' fuertë:

Nasalvar hia'a por pudërë shtë Dios, Shtëda'a, el quë naquëbezë lu trunë, nu por pudërë shtë më nabërlulé Lli'li.

¹¹Grëtë' ra ianglë naquëbezë nga'li zuldí rai' alreduerë trunë ni nu alreduerë ra galdë bi tapë më guani'si, nu alreduerë ra tapë më nanabani. Bëzullibi grëtë' ra mënë ni hashtë bëdchini luquë rai' lu guiu'u. Delantë lu trunë bënë rai' adorar Dios. ¹²Guni'i rai':

Nia Dadë, lë'ë labansë shtë mieti runë tucárl.

Guëni'i mieti llëru'bë na pudërë shtënl, nu rac bé'al grë cusë.

Guëne'e mieti graci lul nu gunë rall honrar lë'ël purquë pudërë nu fuersë shtënl llëru'bë nahin.

Nal Dios shtë na'a por grë tiempë. Amén.

¹³Iurní tubi më guani'si guna'bë dí'dzi' lua:

—¿Chúllëti'i ra ndë'ë naquëbezë ndë'ë, ra nanacu naquichi? ¿Ca nezë ze'dë rai'?

¹⁴Na repia:

—Dadë lë'ël nanël.

Iurní guni'i' lua:

—Lë'ë rai' na ra nagudëdë lu galërzac zi nu bëzunë rai' almë shtë rai'. Na limpi rai' ziquë lari naquichi por rënë shtë nabërlulé Lli'li. ¹⁵Por ni quëbezë rai' delantë lu trunë shtë Dios nu quëhunë rai' sirvë lë'ë më dzë la gue'lë la'ni santuari shtë më. Nu lë'ë më naquëbezë lu trunë canihapë më lë'ë rai' con pudërë shtë më. ¹⁶Hia gúnëdi'i rai' sufrir gubini, ni galërbidchi ldu'u, nilë guëza'i ngubidzë lë'ë rai', ni por galna'i adë gúnëdi'i rall sufrir ¹⁷purquë lë'ë më nabërlulé Lli'li, el quë naná quëbezë guëla'u trunë ni, quëhápí' lë'ë rai' ziquë tubi vëquërë quëhápëll ra lli'li. Nu më rë' gua'a lë'ë rai' catë nanú nisë narne'e vidë eternë. Nu Dios guëcuë'dchí më lu rai' grëtë' nisë narru'u lu rai'.

Séptimo sègi nu gushialë

8 Iurë lë'ë më nabërlulé Lli'li bëche'zë sègi gadchi, iurní bëa'në silënci lu gube'e ziquë mëdi iurë. ²Lueguë gunahia lu gadchi ianglë naná quëbezë zuldí delantë lu Dios; bë'në rai' recibir gadchi

trompetë. ³Despuësë de ni bédchini stubi ianglë nanua'a tubi cinsari orë. Iurní guzuldí' delantë lu bëcu'guë. Bédë'ë rai' zihani ialë parë gúni' ofrecer gushialë lu bëcu'guë juntë con oraciuni shtë ra shmënë Dios. Lë'ë bëcu'guë orë zuga'a delantë trunë. ⁴Lë'ë gushialë nananú guia'a ianglë ni, be'pin hashtë lugar catë quëbezë Dios, juntë con ra oraciuni shtë ra shmënë Dios. ⁵Iurní lë'ë ianglë guna'zi lë'ë cinsari ni; tsadzëhin con gui'i guédchi shtë catë rie'qui. Iurní bëquëldí ianglë gui'i ni lu gué'dchiliu. Gubë nu nalé ruidë gul; bédchini ray shtë nguzi'u nu bëllú gué'dchiliu.

Ra trompetë

⁶Iurní ra zëgadchi ianglë nanua'a ra trompetë, bë'në rai' preparar tē parë gu'ldë rai' trompetë.

⁷Primëre ianglë bi'ldi trompetë; iurní gulaguë guiuguë nu gui'i nutsin con rënë hashtë gué'dchiliu. Güe'qui tecërë partë shtë gué'dchiliu nu tecërë partë shtë ra hiaguë nu tecërë partë plantë narguë.

⁸Segundë ianglë bi'ldi trompetë shtëhi' nu gulaguë ziquë tubi dani ru'bë lu nisë. Dani ni rie'qui con be'llë, nu tecërë partë shtënë nisëdu'u bëaquin ziquë rënë. ⁹Hia tecërë partë shtë ra ma nananú la'ni nisëdu'u, guti ra. Nu tecërë partë shtë ra barcu, grétë' gualú.

¹⁰Lë'ë tecërë ianglë bi'ldi trompetë, iurní tubi mbelëgui'i ru'bë gulaguë dizdë gube'e. Rie'qui mbelëgui'i ziquë grëaguë. Gulaguin lu tecërë partë shtë ra guë'gu nu catë nanú zini. ¹¹Lë'ë mbelëgui'i

ni lë Naldá. Tecërë partë shtë nisë bëaquin ziquë naldá. Cantidá mënë guti purquë bii' rall nisë lda.

¹²Lë'ë ianglë naná cuartë, bi'ldi' trompetë; iurní tecërë partë shtë ngubidzë con tecërë partë shtë mbehu nu ra mbelëgui'i, gullini de manëre quë ra tecërë partë shtë rahin bëa'në nacahi. Bédë'ëdi'i rahin llni durantë tecërë partë shtë dzë nu gue'lë.

¹³Iurní gunahia nu binia tubi ianglë nariasë lu gube'e. Guní'i fuertë:

—Prubi grétë' ra naquërelde lu gué'dchiliu iurë lë'ë ra tsunë ianglë rë' gu'ldë rai' trompetë shtë rai'.

9 Hia lë'ë quintë ianglë bi'ldi trompetë; iurní gunahia tubi mbelëgui'i naná gulaguë dizdë lu gube'e hashtë lu gué'dchiliu. Lë'ë personë ni bë'në recibir liahi shtë guëru naná guetë nu nídi'i fin shtë guëru ni. ²Iurní bëllá'li' guëru ni; hia nga'li be'pi gushë cumë ziquë gushë shtë iurnë ru'bë. Hia lë'ë gushë ni bëcachi lu ngubidzë nu lu gube'e. ³La'ni gushë ni bëru'u ra mbëchizu' naná riasë nu bietë ra ma lu gué'dchiliu. Bë'në ra mbëchizu' recibir pudërë parë gunë ra dañi ziquë nillë shtë gué'dchiliu. ⁴Bë'në rai' recibir ordë adë gunë rai' dañi lu ra plantë rguë, nilë tubi cusë narguë, ni por ra hiaguë, sino nadë más gunë rai' dañi ra mënë naná nuá'adi'i sēñi shtë Dios luquë rai'. ⁵Adë bédë'ëdi'i mē sí de quë quini rai' mënë sino nadë más parë gunë ra mënë sufrir dulurë durantë ga'i mbehu. Lë'ë dulurë ni gaquin ziquë rac tubi mieti iurë rahuë' tubi nillë lë'ë nguui. ⁶Hia dzë ni ra

mënë gac shtu'u rall gati rall perë adë gunë rai' gan gati rai'. Aunquë rac shtu'u mënë gati rall, hia lë'ë galguti ldaguë zitu parë mënë ni.

⁷Ra mbëchizu' rlua'a ziquë guay naná preparadë parë lu guërru. Hia guëc ma napë ma ziquë tubi corunë orë; hia lu ma rlua'a ziquë tubi nguii. ⁸Nu napë ma guitsë guëc ziquë guitsë guëc shtë na'a. Hia lai' ma rlua'a ziquë lai' león. ⁹Cuerpë shtë ra ma nacu bien con shabë ziquë gui'bë; hia ruidë shtë shcuaguë ma na ziquë ruidë shtë cantidá carros nanaquë ra guay iurë lë'ë ra ma zia gl lu'në lu guërru.

¹⁰Napë ma llba'në ma cumë ziquë llba'në nillë con guitsë nazubë guëquin. Hia llba'në ma napë pudërë parë gunë dañi ra mënë por ga'i mbehu. ¹¹Ra mbëchizu' rë' napë rai' tubi jëfë naná mizme ianglë shtë gabildi. Hia lë'ë ianglë rë' lë con di'dzë hebreo, Abadón. Nu dizé griego lë ma Apolión narunë cuntienë el quë narzalú.

¹²Gudëdë primërë cusë dushë perë todavía runë faltë chupë cusë nadzë'bë.

¹³Hia lë'ë sexto ianglë bi'ldi trompetë; iurní binia tubi bë nabëru'u entrë ra tapë cachi nanaquë bëcu'guë shtë orë. Bëcu'guë ni quëbezë delantë lu Dios.

¹⁴Lë'ë bë guni'i lu sexto ianglë nanua'a trompetë:

—Bëlda'ra ra guëzá guëdapë ra ianglë naquëdú rua' guë'gu Eufates.

¹⁵Hia iurní gula'a ra guëzá ianglë ni parë quini rai' tecërë partë shtë mënë. Ra ianglë guc rai' preparadë parë iurë ni, dzë nu izë. ¹⁶Binia

tubi número shtë ra sultadë nanadchi'bë ra guay; na rall dos cientos millones.

¹⁷Zni bëlua'alú ra guay lua. Hia ra nadchi'bë tēchi ma nua'a rai' ldu'u rai' tubi naná canihapë ldu'u rai'. Nahin color llñi; nu azul, nu shlf'echi. Hia ra guay napë ma guëc ma ziquë guëc león; hia rua' ra ma bëru'u be'lë nu gushë nu asufre. ¹⁸Ra tecërë partë shtë mënë guti ra por guëzá tsunë plaguë ni narru'u rua' guay: gui'i, gushë, nu asufre ¹⁹purquë lë'ë ra ma bë'në ra gan con rua' ma, nu con llba'në ma; pues llba'në ma rlua'a ziquë serpientë con guëc shtë ma. Con ra guëc ra ni bë'në rall dañi.

²⁰Perë los de más mënë nagútidi'i por ra cashtigu ni, nunquë adë bësá'nëdi'i rall gunë rall cusë mal, nu bësá'nëdi'i rall gunë rall adorar ra espíritu mal con ra dzanë ídolo shtë orë u ra dzanë bēdchichi, u gui'bë shlf'echi u guë'ë u hiaguë. Bësá'nëdi'i rall gunë rall adorar ra cusë ni aunquë adë ráquëdi'i guëná rahin, nu adë ráquëdi'i rall rzë rall. ²¹Nu zac adë bësá'nëdi'i ra mënë quini sa' rall nu ni por galbëlliú shtë rall, nu ni por galërquënú tse'lë sa' rall, nilë por rbézëdi'i mënë rbaa'në rall pë shtë sa' rall.

Lë'ë ianglë nanua'a tubi librë bi'chi

10 Iurní gunahia stubi ianglë nanapë pudërë ru'bë naná bēdchini de gube'e. Lë'ë ianglë nácui' shchahi nu nanú tubi iarcu iris guéqui'. Lúhi' rabtsë'ë ziquë ngubidzë; hia guëáhi' rlua'a ziquë tubi mbēduni shtë be'lë. ²Nuá'ai' guiá'ai' tubi librë mitu'në naná

lla'lä. Iurní bēzúhi' guéáhi' ladē ldi lu nisēdu'u, nu guéáhi' ladē rubēsē bēzúhi' lu gué'dchiliu. ³Iurní fuertē guní'i' ziquē rzubá ra león. ⁴Iurē gualú ra gadchi nguzi'u, iurní guc shtua'a niaquēa'a perē binia tubi bē nabēdchini de gube'e; guní'i':

—Adē rquēbidi'il lo quē naguni'i' ra nguzi'u; adē rquē'ēdi'il lo quē naguni'i' rai'.

⁵Lueguē lē'ē ianglē nagunahia, zu guéáhi' lu nisēdu'u nu gué'dchiliu, bēldísi' guia'a ladē ldi lu gube'e.

⁶Bé'ni' jurar por lē mē naná bēntsa'u gube'e nu gué'dchiliu, nu nisēdu'u nu grē ra cusē nananú lu rahin. Guni'i' ianglē:

—Hia bēga'a iurē; nádi'i' más tiempē. ⁷Iurē lē'ē ianglē nagadchi guzublú gu'ldē trompetē shēhi', iurní hia guc cumplir lo quē nabē'nē Dios disponer antsē cumē ziquē guni'i' mē lu ra muzē shtē mē, ra nabiadi'dzē shti'dzē mē.

⁸Hia bē naná binia, bē nabēdchini de gube'e, bēabrí guní'i' lua:

—Gua iurne' tē guéná'zil librē naná lla'lä, librē nananú guia'a ianglē naná zuldí lu nisēdu'u nu lu gué'dchiliu.

⁹Iurní guahia lu ianglē nu guna'ba tē parē guéné'ei' librē. Iurní guni'i' ianglē lua:

—Guna'zi librē rē; bi'ldi la'nin nu bē'nē llgabē pē runē cuntienē ra di'dzē. Primērē gac ra di'dzē ziquē dchini shtē mbee'zē perē despuēsē guēaquin cumē cusē naldá.

¹⁰Iurní guna'zia librē rē' nananú guia'a ianglē. Bi'ldia la'nin; bēna llgabē. Primērē cusē za'quē nahin perē despuēsē guquin cusē naldá.

¹¹Lueguē guní'i':

—Napē quē guēabril stubi.

Tsagní'il shti'dzē Dios lu grētē' ra mēnē, gué'dchi ra, lu ra naciuni, nu lugar catē ruadi'dzē mēnē grē clasē dizē, nu lu ra rēy. Guéní'il shti'dzē mē.

Ra chupē testigu

11 Iurní bēne'e rai' tubi varē narrē'shē guiu'u cuahia, nu guni'i' rai' lua:

—Guasuldí nu guna'zi medidē rē; bērē'shē santuari shtē Dios, nu bērē'shē bēcuguē, nu bēlabē bēldá naná quēhunē adorar lē'ē Dadē nga'li. ²Perē adē rrē'shēdi'il lu rualdēa' naná tēchi fuērē shtē iádu'u purquē grētē' ni bēne'e Dios permisi parē mē zitu guélú rall. Grē ra mēnē ni guélú ra guēc Jerusalén durantē cuarenta y chupē mbehu. ³Perē guēshe'lda chupē testigu shtēna parē guadi'dzē rai' shti'dza durantē mili chupē gahiu'a sesenta dzē. Nacu rai' shabē rai' color nagasē.

⁴Lē'ē testigu rē' runē significar chupē hiaguē olivos, nu zac runē significar chupē gandelier naná quēbezē delantē lu Dadē narnibē'a gué'dchiliu. ⁵Si talē chu rac shtu'u gunē dañi parē lē'ē testigu ni, pues lē'ē rai' napē rai' pudērē parē guēru'u gui'i' rua' rai' naná guēza'i completamente lē'ē contrari shtē rai'. Zni gati ra grē ra narac shtu'u quini lē'ē rai'. ⁶Testigu rē' napē pudērē parē guēsē'au rai' gube'e tē parē ldáguēdi'i' guiu durantē tiempē naguadi'dzē rai' shti'dzē Dios, nu napē rai' pudērē parē gunē rai' cambi nisē; gaquin rēnē, nu parē guēshe'ldē rai' plaguē u galguidzē

tantë cumë ziquë guëni'i ldu'u rai'.

⁷Perë iurë tsalú grë lo quë nagunë ra testigu ni, iurní lë'ë ma dushë nabëru'u gabildi, guëna'zi ma lë'ë rai' nu gunë ma dushë gan lu rai' hashtë gati rai'. ⁸Hia shcuerpë rai' guëa'nin lu nezë shtë ciudá ru'bë catë bëquë'ë ra mënë lë'ë Dadë lu cruz. Stubi lë ciudá ni na Sodoma, nu zac Egipto. ⁹Hia por tsunë dzë guërudë, guëa'në ra shcuerpë testigu ni lu nezë. Mënë shtë grë guë'dchi, mënë naruadi'dzë grë clasë dizë, mënë naze'dë de grë lugar nu naciuni, guëná rall lu ra tēgulë nu adë guëdë'ëdi'i rall permisi parë guëga'chi ra tēgulë.

¹⁰Ra naquërelde lu guë'dchiliu guëquitë ldu'u rall purquë guti ra testigu ni, nu nalë guëuu' ldu'u rall hashtë guëshe'ldë rall regalë lu sa' rall purquë guëzá guërupë nguui ni nabiadi'dzë shti'dzë Dios, guti rai'. Bëzac zi rai' ra mënë shtë guë'dchiliu. ¹¹Perë despuësë tsunë dzë guërudë, Dios bëcua'ni lë'ë rai' parë guëbani rai' stubi, nu grë ra naguná lu rai', nalë bēdzēbē rall iurní. ¹²Lueguë iurní guërupë testigu ni bini rai' tubi bë dizdë lu gube'e naná guni'i:

—Gulë tsepi ndë'ë.

Iurní be'pi rai' gube'e la'ni tubi shcahi. Hia ra contrari shtë rai' guná rall. ¹³Mizme iurní gu' tubi llu ru'bë nu guëzá chi'i partë shtëne ciudá gualú nu gadchi mili mënë guti; bë'në llu. Los de más mënë nabëa'në, nalë bēdzēbē rall. Guni'i rall llëru'bë na pudërë shtë Dios.

¹⁴Zni gudëdë segundë cusë nadzë'bë perë lueguë guëdchini stubi naná tecërë.

Trompetë gadchi

¹⁵Lë'ë ianglë gadchi bi'ldi trompetë shtëni'. Iurní bēdchini bë fuertë dizdë gube'e. Guni'i bë:

Lugar catë rnibë'a rëy shtë guë'dchiliu, bëaquin lugar parë guëribë'a Dios, Shtëda'a nu Cristo shini më.

Lë'ë më guëribë'a më ziquë rëy parë siembrë.

¹⁶Iurní ra galdë bi tapë më guani'si naná quëbezë lu trunë shtë rai' delantë lu Dios, bëzullibi rai' hashtë bēdchini luquë rai' lu guiu'u nu bë'në rai' adorar Dios. ¹⁷Guni'i rai':

Dzu guëne'e na'a graci lul, Dadë. Nápël grë pudërë; nabánil parë siembrë.

Napë quë guëdchínil parë guëribé'al; nu nal Rëy iurne'.

¹⁸Ra mënë shtë grë naciuni, bēldë rall perë hia bëga'a iurë parë gúnël cashtigu lë'ë rall. Bëga'a tiempë gúnël juzguë ra tēgulë.

Guëné'el premi ca'a ra naná runë honrar lë'ël, grë ra naná limpi delantë lul, nu grë ra narzu'bë diaguë shtí'dzël, grëtë' ra narnibë'a, nu grëtë' ra mënë nanádi'i mënë nallasac.

Bëga'a iurë parë gúnël tsalú con grëtë' ra narzac zi sa' rall parë tsalú sa' rall.

¹⁹Iurní bëlla'lë santuari shtë Dios nananú gube'e, nu gunahia tubi cajë shtë conveñi la'ni iádu'u. Iurní gubé la'ni gube'e; gu'të gui'i nguizi'u; binia ruidë dushë; bëllú guë'dchiliu nu gulaguë tubi guiuguë fuertë.

Tubi na'a con ma dushë dragón

12 Iurní bēlua'a tubi sēñi lu gube'e. Tubi na'a bēlua'alú lua; zúbì' la'ni llni shtë ngubidzē nu zübē mbehu guéáhi' nu nápi' guéqui' tubi corunē nanua'a chi'bē chupē mbelēgui'i. ²Na'a ni nuá shíni' nu gurushtiá na'a con dulturē shtë nagalē shini na'a. Pues nalé rzac zi na'a parē guédchini shini na'a guédchiliu. ³Lueguē bēlua'a stubi sēñi lu gube'e, tubi ma dushē dragón. Naru'bē ma nu na ma color llni nu napē ma gadchi guēc ma nu chi'i cachi, nu nanú tubi corunē cadē gadchi guēc ma. Nu nadchi'bē tubi corunē cadē guēc ma. ⁴Hia con llba'nē ma lē'ē dragón bētēá tecērē partē shtë mbelēgui'i nu bēquēldí ma mbelēgui'i hashtë lu guédchiliu. Dragón rē' bēa'nē delantē lu na'a parē iurē lē'ē shini na'a galē, tē parē gau ma lē'ē me'dē. ⁵Lueguē lē'ē na'a gupē tubi ngulē'nē naná destinadē parē guēnibē'ai' grē naciuni tubi manērē nadushē. Lueguē lē'ē shini na'a guabsú; bia'a Dios lē'i' hashtë trunē shtēnē mē lu gube'e. ⁶Hia lē'ē na'a bēllu'nē na'a parē tubi lugar catē chu nádi'i. Lugar ni bē'nē Dios preparar tē nga'li guēquērdē na'a parē guédē'ē mēnē nagáu na'a por mili chupē gahiu'a sesenta dzē.

⁷Despuēsē de ni, gu' tubi guērru lu gube'e. Lē'ē ianglē ru'bē Miguel con sáhi', gudildinú rai' con lē'ē ma dragón nu con grē sa' ma.

⁸Lē'ē ma con ra ianglē shtēnēll, gudildi rall perē adē bē'nēdi'i rall gan lu guērru; nu adē bēdzélēdi'i lugar parē lē'ē rall lu gube'e. ⁹Zni

bēquēldí Dios lē'ē dragón de gube'e; ma ni na mizmē serpentē nanabani dizdē más guahietē. Lēll Diablo nu lēll Satanás naná quēgsiguē guédubi mēnē shtë guédchiliu. Lē'ēll con ianglē shtēnēll, Dios bēquēldí lē'ē rall lu guédchiliu.

¹⁰Iurní binia tubi bē fuertē lu gube'e; guní'i':

—Hia bēdchini salvaciuni nu pudērē shtë Dios. Hia bēga'a iurē parē guēnibē'a mē por autoridá shtë Cristo purquē hia lē'ē contrari shtë sa' hia'a bēquēldí Dios lē'ēll lu guédchiliu. Pues lē'ēll bēdchi'bē galquiá cuntrē ra shmēnē Dios dzē la gue'lē. ¹¹Ra bēchi sa' hia'a bē'nē rai' gan lu enemigu por rēnē shtë Lli'li nu bē'nē rai' gan lu enemigu ni purquē biadi'dzē rai' diza'quē. Adē bēdzébēdi'i rai' gati rai' por lē'ē mē. ¹²Gulē bēquitē ldu'u tē iurnē, grē tē naná quērdē lu gube'e; perē prubi ra nananú lu guédchiliu nu ra narzē lu nisēdu'u la'ni barcu purquē lē'ē mēdzabē bietē catē quērdē tē nu nalē rldēll purquē nanēll du'pē tiempē runē faltē parē gunē mē cashtigu lē'ēll.

¹³Iurē lē'ē dragón guc bē'a de quē Dios bēquēldí lē'ēll lu guédchiliu, guzunáldēll lē'ē na'a nanapē shíni'. ¹⁴Perē lē'ē na'a bē'ni' recibir shcuágui' ziquē shcuaguē mbiási tē gac tsasē na'a tubi lugar lu shlatē zitu parē lu serpentē ni. Ndē lē'ē na'a ni nasegurē nu bē'nēll recibir nagáu por tsunē izē guērdē. ¹⁵Lē'ē serpentē bēquēldí nisē con rua'll parē gaquin tubi guēē'gu tē gua'a nisē lē'ē na'a. ¹⁶Perē guiu'u bē'nē campāñi lē'ē na'a nu bēlla'lē guiu'u. Bi'i' guiu'u nisē nabēru'u rua'

dragón. ¹⁷Con ni lè'è dragón nalé beldèll cuntrè lè'è na'a. Iurní zia'a dragón parè tsatildinull los de más ra shini na'a, ra narunè cumplir mandamientè shtë Dios nu naná ruadi'dzè diza'què shtë Jesucristo, ra naná testigu shtë mè.

Chupè ma dushè

13 Iurní guasuldía rua' nisèdu'u. Gunahia bèru'u la'ni nisèdu'u, be'pi tubi ma dushè nanapè gadchi guéquèll, nu nápèll chi'i cachi. Cadè cachi napè tubi coronè nu cadè guéquèll naqué tubi lè dzabè nabè'nè ofender Dios. ²Lè'è ma rè' nagunahia, rlua'a ziquè tigrè; napè ma ziquè guèa' oso, nu rua' ma na ziquè rua' león. Lè'è dragón bédè'è pudèrè nu autoridá nu permisi parè zubè ma ni lu trunè shtë dragón parè guè'nibè'a ma. ³Tubi de lè'è guèc ma dushè rlua'a ziquè nuá'all tubi ridè naná gudini lè'è ma perè ridè ni bèac. Nu guèdubi mènè shtë guédchiliu bédzèguèè' ldu'u rall nu guanaldè rall tèchi ma dushè. ⁴Nu bè'nè mènè adorar lè'è dragón purquè bédè'èll llèru'bè pudèrè parè lè'è ma dushè, nu zac bè'nè ra mènè adorar lè'è ma dushè. Guni'i rall: —Nídi'i chu stubi ziquè ma dushè rè'. Adè chu gunè gan lull.

⁵Nu lè'è ma dushè bè'nè recibir permisi parè guèni'i ma di'dzè dzabè, cusè narunè ofender Dios. Napè ma ni pudèrè parè gúnèll ra cusè dzabè durantè cuarenta y dos mbehu. ⁶Zni bè'nè ma dushè; guní'ill cuntrè Dios nu gudell guèc Dadè nu guèc santuari shtë mè nu guèc ra naquèbezè lu gube'e. ⁷Nu

zac lè'è ma dushè bè'nèll recibir permisi tè tildinull con grè shmènè Dios hashtë bè'nèll gan lu rai'. Nu napè ma ni autoridá subrè grè ra mènè, grè naciuni, grè guè'dchi, nu grè lugar catè ruadi'dzè mènè grè clasè dizé. ⁸Grè ra mènè naquèrèldè lu guédchiliu, bè'nè rall adorar lè'è ma dushè, ra mènè nanádi'i escritè lè rall la'ni librè. Librè ni naescritè lè ra nanapè vidè eternè. Guc escritè ni dizdè gurèshhtë guédchiliu. Lè librè ni na librè shtë el què nabèrulé Lli'li naná guti ziquè lli'li.

⁹El què narquè diaguè shti'dza, gulè bèquè diaguè shti'dza. ¹⁰Grètè' el què naguzac zi mènè lachigui'bè, mizmè lé'èll tsa lachigui'bè. Nu grè ra narguini sáhi' con spadè nu zac lé'èll gátill con spadè. Por ni grètè' naná shmènè Dios rqui'ni gapè rai' pacènci nu fe.

¹¹Despuèsè de ni, gunahia stubi ma dushè nabèru'u tubi guèru shtë guédchiliu. Ma ni napè chupè cachi narlua'a ziquè cachi shtë lli'li perè ruadi'dzè ma ziquè cha' dragón.

¹²Nu napè ma pudèrè shtë primèrè ma dushè nu zúbèll shlugar ma ni. Nu bè'nè segundè ma parè grè ra mènè shtë guédchiliu bè'nè rall adorar primèrè ma dushè; ma ni bè'nèac ridè naná bédè'è galguti parè lé'èll. ¹³Nu zac bè'nè ma sèni ru'bè nu milagrè hashtë bédchini gui'i shtë gube'e hashtë guédchiliu por pudèrè shtë ma. Ra mènè guná rall milagrè ni. ¹⁴Por medio de grè milagrè nabè'nè ma dushè delantè lu primèrè ma dushè, bèsigué ma grètè' ra naquèrèldè lu guédchiliu nu gunibè'a ma de què gactsa'u

tubi figurè shtë ma dushë nanua'a ridë. Ridë ni guquin por tubi spadë perë adë gútidi'i ma. ¹⁵Hia lë'ë segundë ma dushë bën'ëll recibir pudërë parë guëd'ë ma vidë lë'ë figurè shtë primërë ma dushë, nu zac béd'ë'll pudërë parë guadi'dzë figurè ni nu parë quini ma grët'el quë adë néd'i gúnëll adorar lë'ë ma. ¹⁶Nu bën'ë ma parë guëquë'ë tubi marquë guia'a ladi ldi mënë u luquë mënë. Grë ra mënë ru'bë nu ra nalasáquëdi'i, grë ra ricu nu ra prubi, grë ra naná librë nu ra naná bajo ordë shtë sa' rall, bën'ë rall recibir marquë ni. ¹⁷Ni tubi adë gáquëdi'i guëtuu'll nilë por sí'll si talë nápëdi'll lë shtë ma u número shtë lë ma ni. ¹⁸Rqui'ni llini tē tsasé mieti di'dzë rë'. El quë naná riasé, bën'ë calcular número shtë ma dushë. Lë'ë número runë significar lë shtë tubi nguii. Número ni na shu'pë gahiu'a sesenta con shu'pë.

Cantë shtë 144,000 mënë

14 Iurní gunahia lu Lli'li naná zuldí guëc tubi dani lë Sión. Con lë'ë Lli'li quëbezënú tubi gahiu'a cuarenta con tapë mili mënë. Lë Lli'li naescritë luquë rai' nu zac lë shtë Shtadë Lli'li naescritë luquë ra mënë ni. ²Lueguë iurní binia tubi bē naná ze'dë dizdë gube'e. Nahin ziquë ruidë shtënë cantidá guëë'gu, nu ziquë iurë rguini nguzi'u fuertë. Bē ni na ziquë cha' zihani arpa naquëu'ldë ra mënë. ³Nu quëu'ldë rai' tubi cantë cubi delantë lu trunë nu delantë lu guëzá tapë ra nanabani, nu delantë lu ra mē guani'si. Perë ni tubi chu adë riaséd'i cantë ni sino

nadë más niá'asë ra ciento cuarenta y cuatro mili nanaguc salvar entrë los de más mënë shtë guédchiliu. ⁴Ra mënë ni adë cuënúdi'i rai' tse'lë sa' rai'; na rai' limpi, nu zianaldë rai' lë'ë Lli'li cualquier nezë tsáhi'. Guc salvar rai' entrë los de más mënë ziquë primërë grupë shtë ra naná rialdí ldu'i shti'dzë Dios. Zni guc rai' ziquë ofrendë lu Dios nu lu Lli'li. ⁵También ni tubi de lë'ë rai' nabíshidi'i sino limpi na rai' delantë lu Dios catë quëbezë mē.

Di'dzë shtë tsunë ianglë

⁶Iurní gunahia stubi ianglë naná riasë lu gube'e. Nua'a ianglë ni diza'quë parë guadi'dzënúhi' diza'quë lu ra mënë narëta' lu guédchiliu, ra mënë shtë naciuni, ra nabiadi'dzë grë clasë dizé, ra naquërelde lu guëdubi guédchiliu. Diza'quë nanua'a ianglë, nápëdi'in fin. ⁷Guni'i ianglë fuertë:

—Gulë gapë respëti Dios, nu gulë béd'ë labansë parë lë'i'. Hia bēga'a iurë gunë mē juzguë lë'ë ra mënë. Gulë bē'në adorar el quë nabēntsa'u gube'e nu guédchiliu, nisëdu'u nu grë ra zini.

⁸Despuësë gualú shti'dzë primërë ianglë, iurní guni'i segundë ianglë ni:

—Hia lë'ë ciudá Babilonia ru'bë gunë Dios juzguë purquë ziquë tubi narzuu'dchi con vini, zni bē'në Babilonia con los de más naciuni parë gunë rall duldë, cusë nadë rlluf'idi'i.

⁹Lueguë iurní tecërë ianglë guni'i fuertë:

—Si talë tubi gunë adorar lë'ë ma dushë u figurè shtënëll, nu guëd'ëll

permisi què marquè shtë ma dushë luquè nguui u guia'a nguui, ¹⁰pues nguui ni napè què sac zill lu cashtigu dushë naze'dè de Dios. Cashtigu ni na llanè shtë më nu adè nùtsèdi'in con galèrga'a ldu'u më. Nguui ni gúnèll sufrir la'ni gui'i nu asufre delantè lu ra ianglè santu shtë Dios nu delantè lu Lli'li. ¹¹Lè'è gushë shtënè cashtigu ni tsepi durantè grè ra siglo. Nídi'i descansè dzè, nilè gue'llè parè ra narunè adorar lè'è ma dushë nu figurè shtë ma, u ra nabè'nè recibir marquè shtë ma. ¹²Por ni grè ra shmènè Dios, nu ra narzu'bè diaguè shti'dzè më, ra narianaldè bien enseñansè shtë Jesús, rqui'ni gapè rai' pacènci.

¹³Iurní binia tubi bè nabèru'u de gube'le. Guni'i bè lua:

—Bèquè'è ndè'è: “Guèquitè ldu'u ra tègulè parè siemprè, ra naná shmènè Dadè Jesús”. Zni rni'i Espíritu. Pues guèzi'i ldu'u rai'; napè rai' descansè nu guèdè'lè Dios premi por dchi'ni nabè'nè rai'.

Cashtigu parè gué'dchiliu

¹⁴Iurní gunahia lu tubi shcachi naquichi. Quèbezè lu shcachi tubi më narlua'a ziquè Jesús. Nápi' tubi corunè orè guéqui' nu nápi' tubi cierrè dushè guiá'ai' narunè significar cashtigu naze'dè guèdchini. ¹⁵Bèru'u stubi ianglè la'ni iádu'u. Ianglè ni guni'i lu nguui nazubè rua' shcachi:

—Iurne' bétia'a cierrè shtënèl tē guètēal cusechē purquē hia iurē bēga'a parē guèdēahin.

¹⁶Lueguè el què nazubè rua' shcachi bètéd'i' cierrè lu gué'dchiliu nu bètēahi' cusechē.

¹⁷Iurní stubi ianglè bèru'u la'ni iádu'u naná quèbezè gube'le, nu zac lé'i' nuá'ai' tubi cierrè dushè. ¹⁸Bèru'u stubi ianglè nanapè pudèrè la'ni santuari parè guènbé'ai' gui'i. Guná'bèi' con voz fuertè lu naná nua'a cierrè dushè. Guní'i':
—Hia bēga'a iurē parē gac cashtigu ra mēnē mal narēta' lu gué'dchiliu. Gaquin ziquè tubi mēnē narldaguè nashi uvè tē guèru'u juguè shtë uvè.

¹⁹Hia lè'è ianglè ni bètéd'è cierrè shtëni' lu gué'dchiliu nu bètēahi' cusechē shtë uvè. Iurní bētiá'ai' uvè ni la'ni catè tsutsa'uin tē parē guèru'u nisè shtë uvè. Ni runè significar cashtigu dushè naná ze'dè guèc ra mēnē mal. ²⁰Ra uvè bèru'u nisè shtëni' fuèrè shtë ciudá; hia lugar ni bèru'u mēnē; bēdchini rēnē hashtë catè lu naná rquè frēnē shtë guay. Rēnē ni guc tubi guèè'gu de tsunè gahiu'a kilómetros.

Ra ianglè naguèsédchini gadchi plaguè

15 Iurní gunahia lu gube'le stubi sēni ru'bē, cusē nadzē'bē; gunahia gadchi ianglè naguèsédchini gadchi plaguè. Hia con lúltimè plaguè ni gualú llanè shtë Dios.

²Nu zac gunahia tubi cusè narlua'a ziquè nisèdu'u shtë vidrio nutsin con gui'i. Gunahia lu ra nabè'nè gan lu ma dushè con figurè shtënèll, nu bè'nè rall gan lu número shtë ma ni. Ra mēnē ni zuldí rai' cula'ni rua' nisèdu'u naná ziquè vidrio. Nua'a rai' arpa nabèdè'lè Dios ca'a rai'. ³Nu quèu'ldè rai' tubi cantè shtë Moisés,

el quë nabë'në sirvë lu Dios. Nu cantë ni na cantë shtë Lli'li naná rni'i zndë'ë:

Llëru'bë na pudërë shtë'nël. Nalé nasa'a na lo quë nabëntsá'ul, Dadë Dios. Lé'ël rni'bé'al grété' cusë.

Tubldí nu verdá na lo quë naquëhúnël, lé'ël Rëy shtë naciuni.

⁴Grë mieti rdzëbë lé'ël, Dadë. Grë mieti gunë rall adorar lé'ël. Pues sulë lé'ël nal santu.

Grë naciuni guëdchini delantë lul nu gunë rall adorar lé'ël purquë guná rall grë lo quë nacanihúnël.

Nahin cusë za'quë nu justë.

⁵Despuësë de ni, gunahia lu gube'e nu bëlla'lë santuari shtë iádu'u catë nutsa'u ra tablë shtë lëy. ⁶De lë'ë santuari ni bëru'u gadchi ianglë naguësëdchini ra gadchi plaguë. Nacu rai' lari lino fini nu limpi; nu rabtsë'in. Napë rai' cinturón shtë orë dëdë laguë ldu'u rai'. ⁷Iurní tubi de tapë nanabani bédë'lë tubi copë orë cadë ra gadchi ianglë. Cadë copë gadzé con cashtigu dushë naze'dë de Dios, el quë nanabani por guëdubi siglo.

⁸Hia lë'ë santuari gadzé gushë naná ze'dë de lugar catë quëbezë Dios. Llëru'bë na pudërë shtë më. Ni tubi adë chu tsutédi'i nga'li hashtë iurë gualú gadchi plaguë nabësëdchini ra gadchi ianglë.

Ra copë shtë cashtigu

16 Iurní binia tubi bë fuertë naná bëru'u de lu santuari. Voz ni guni'i lu gadchi ianglë:

—Gulë tsaglda'të ra copë shtë cashtigu lu guë'dchiliu, ra cashtigu dushë shtë Dios.

²Primërë ianglë guagldá'ti' copë lu guë'dchiliu. Grété' mënë nanapë marquë shtë ma dushë nu naná bë'në adorar figurë shtë ma, ni bëru'u guëë'dzu dushë ladi rall; nalë nahi'u'bë ra guëë'dzu.

³Segundë ianglë guagldá'ti' copë shtëhi' lu nisëdu'u; nu lë'ë nisë bëaquin rënë ziquë rënë shtë tégulë. Hia guti grë ra nanapë vidë la'ni nisë ni.

⁴Tecërë ianglë guagldá'ti' copë shtëni' lu guëë'gu nu lu ra zini; hia bëac rahin rënë. ⁵Lueguë binia bë shtë ianglë naquëhapë nisë. Guní'i':

—Naza'quë lo quë nabë'nël, Dadë Dios. Nal Santu. Nal principi nu lé'ël nal fin. ⁶Justë nal purquë lë'ë mënë ni gudini rall shmënël; gudini rall ra nabiadi'dzë shtëi'dzël. Pues iurne' lé'ël bé'nël parë bii' rall rënë shtë guëë'gu nu zini purquë zni runë tucarë rall.

⁷Bini zaca tubi bë nabëdchini dizdë bëcu'guë; guní'i':

—Nia Dadë Dios, rni'bé'al grété' cusë. Bé'nël juzguë con verdá nu manërë tubldí.

⁸Hia cuartë ianglë guagldá'ti' copë shtëni' lu ngubidzë nu bédë'ëi' pudërë lë'ë ngubidzë parë guëza'i ngubidzë ra mënë con gui'i'. ⁹Grété' mënë güe'qui ra, cusë nadzë'bë, perë adë bë'nëdi'i rall cambi mudë nanabani rall, nu adë guní'idi'i rall llëru'bë na pudërë de Dios sino guni'i' rall cusë dzabë cuntrë lë'ë më, el quë nanapë pudërë subrë grété' ra plaguë rë'.

¹⁰Quintē ianglë guagldá'ti' copë shténi' lu trunë catë quëbezë ma dushë; iurní catë rnibë'all bëa'në nacahi. Ra mënë gudáhuë' rall ldudzë rall por tantë dudurë. ¹¹Nilë por ni adë bësá'nëdi'i rall parë quëhunë rall mal. Más guni'i rall cusë dzabë cuntrë Dios naquëbezë gube'e por tantë dudurë nu guë'dzu shtë rall.

¹²Hia lë'ë sexto ianglë guaglda'të copë shtëhi' lu nisë shtë guë'gu Eufates; hia lë'ë nisë ni gubidchi parë gac tubi nezë, tädë ra rëy naze'dë nezë guia'a.

¹³Iurní gunahia lu dragón nu lë'ë ma dushë nu lë'ë nabishi; rua' rall bëru'u tsunë espíritu mal naná formë shtë lla'u. ¹⁴Ndë'ë na ra espíritu shtë ra mëdzabë perë napë ra pudërë parë gunë rall milagrë. Bëru'u rall parë guëtëá rall grëtë' ra rëy shtë guë'dchiliu parë lu guërru. Gaquin dzë narunë Dios disponer. Napë më grë pudërë. ¹⁵“Gulë guná, na zelda sin quë adë gac ldé'édia'a, ziquë ridë tubi nguba'në. Dichusë el quë naná zu nasini iurní nu quëhápëll shábëll tē parë adë sédi'i rall con galështú delantë lu më”. ¹⁶Hia iurní bëtëá rall ra rëy lugar nalë con di'dzë hebreo, lëhin Armagedón.

¹⁷Hia séptimo ianglë guaglda'të copë shtëhi' lu mbë. Iurní dizdë santuari la'ni gube'e, bëru'u tubi bë fuertë naze'dë de lu trunë. Guni'i bë:

—Hia bēdchini fin.

¹⁸Iurní gu' tubi gu'të nguzi'u nu gu' ruidë nu gudini nguzi'u. Lë'ë guë'dchiliu bëllú; bëchi'chi guë'dchiliu con tubi llu más fuertë

quë grë ra llu naná bēdchini dizdë lë'ë më bëcua'shtë më guë'dchiliu.

¹⁹Lë'ë ciudá ru'bë gure'zin tsunë partë nu grë ciudá shtë guë'dchiliu guré rahin. Iurní Dios bëagná ldu'i lë'ë ciudá ru'bë Babilonia. Bëshe'ldë më cashtigu dushë guëc ra mënë shtë ciudá ni, tantë llanë napë më. ²⁰Grëtë' ra dani nu ra dani la'ni nisë, gunitilú rahin. ²¹Nu zac gulaguë de gube'e guiuguë ru'bë subrë guëc ra mënë. Guiuguë ni rzunë'ë cuarenta kilos. Perë ra nguui guni'i rall cusë dzabë cuntrë Dios por ra plaguë shtë guiuguë. Guquin tubi cashtigu dushë nabëshe'ldë Dios.

Bë'në Dios condenar na'a mal

17 Iurní bēdchini tubi de gadchi ianglë nanua'a gadchi copë; më ni guni'i lua: —Gude'e tē guëluá'ahia cashtigu shtë na'a mal naná zúbëga'a lu nisë zili; runë cuntienë rnibë'a na'a zihani mënë. ²Ra rëy shtë guë'dchiliu na rall ziquë mënë adulteri; bëzullibi rall lu ra dzanë ídolo; mënë narëta' lu guë'dchiliu na rall ziquë narzuu'dchi purquë bë'në rall neguci mal con lë'ë na'a ni.

³Lueguë Espíritu bëlua'a stubi cusë lua; lë'ë ianglë bia'a na lu tubi shlatë catë nídi'i mënë. Gunahia tubi na'a nadchi'bë tubi ma dushë color llini; ma dushë ni napë gadchi guëc ma nu chi'i cachi. ⁴Lë'ë na'a rë' nacu con lari color moradë nu llini; nu zutsa'u na'a con orë nu guë'ë nallasac nu perlas. Nuá'all tubi copë orë narunë significar cusë dzabë nabë'nëll nu mal vidë nanabani

na'a ni. ⁵Nu naqué luqué na'a tubi lë narunë significar cusë naga'chi: "Babilonia ru'bë naná shni'a ra na'a mal, nu de grë cusë narná tushë Dios la'ni gué'dchiliu". ⁶Lueguë gunahia na'a ni ziquë narzuu'dchi purquë gudínill zihani shmënë Dios naná guti purquë gualdí ldu'u rai' shti'dzë Jesús, ra nabëzuné Dios almë shtë rai'. Iurë gunahia lu na'a ni, iurní nalé guasé ldu'a'a. ⁷Iurní lë'ë ianglë guni'i lua:

—¿Pëzielú rdzëguë' ldu'ul? Guëni'ihia lul pë runë cuntienë secretë shtë na'a ni nu pë runë cuntienë lë'ë ma dushë catë dchi'bë na'a, lë'ë ma nanapë gadchi guëc nu chi'i cachi. ⁸Lë'ë ma dushë nagunal, na tubi nagubani antsë perë nídi'i' iurne'; perë sin quë adë guëtédëdi'i, lë'ë ma guëru'u de guëru guetë, nu despuësë gátill nu tsall lu gabildi catë nídi'i' fin. Ra naquërelde lu gué'dchiliu, ra nanádi'i' escritë ra lë rall la'ni librë shtë vidë dizdë lë'ë gué'dchiliu gurështë, ni lë'ë rall guëdzëguë' ldu'u rall iurë guená rall lë'ë ma dushë nanabani antsë perë guti ma, perë bëabrí gubani ma stubi.

⁹Ndë'ë rqui'ni du'pë llni parë tsasé hia'a. Ra gadchi guëc ma runë significar gadchi dani catë zúbëga'a na'a ni. ¹⁰Nu ra guëc ma runë significar gadchi rëy. Ga'i rëy ni gudëdë; gunitil' rai'. Tubi de lë'ë ra rëy ni quëgnibë'a iurne'. Hia stúbill todavía la'di guëdchínidi'i, perë iurë guëdchínill, adë guëni'bë'adi'ill llëduni tiempë. ¹¹Lë'ë ma dushë naná gubani antsë perë hia nídi'ill, ni lë'ë naná octavo rëy aunquë na rëy ni tubi de gadchi rëy. Despuësë

guzia'a rëy ni lu galguti parë siempërë.

¹²Ra chi'i cachi nagunal, ni runë significar chi'i rëy todavía adë subëlúdi'i guëni'bë'a rall, perë gunë rall recibir pudërë parë guëni'bë'a rall ziquë rëy por tubsë iurë juntë con lë'ë ma dushë. ¹³Ra chi'i rëy rë' gac rall de acuerdë nu gunë rall intriegu pudërë nu autoridá shtë rall parë lë'ë ma dushë. ¹⁴Tildi rall cuntrë el quë nabërlulé Li'li perë lë'ë Li'li gúni' gan lu rall purquë lë'ë më napë më más pudërë quë grë ra narnibë'a; más pudërë napë më quë grë ra rëy shtë gué'dchiliu. Ra mënë naquëbezënu lë'ë më, guna'bë më lë'ë rai'; gulë më lë'ë rai'; na rai' shmënë më nabë'në cumplir voluntá shtë më.

¹⁵Lë'ë ianglë guni'i lua shcuendë nisë:

—Ra nisë zili nagunal catë zubë lë'ë na'a mal, na ra gué'dchi, mënë, ra naruadi'dzë grë clasë dizé, nu grë ra naciuni. ¹⁶Ra chi'i cachi nagunal guëc ma dushë, na ra contrari shtë na'a mal. Guená tushë rall lë'ë na'a ni nu guëa'në na'a ni sin adë chu nádi'i' cula'ni. Nu guëa'në na'a sin shábi'. Nu tsalú pudërë shtë'nëll; gáquëll ziquë tubi cusë narie'qui lu gui'i. ¹⁷Zni gac purquë Dios bë'në tē gunë ra chi'i rëy lo quë narni'i ldu'u më. Por ni bëa'në rall de acuerdë nu bēdē'ë rall pudērë shtë rall guia'a ma dushë hashtë gac cumplir lo quë naguni'i Dios. ¹⁸Lë'ë na'a nagunal, na lë'ë ciudá ru'bë naquëgnibë'a ra rëy shtë gué'dchiliu.

Ciudad Babilonia gualú

18 Despuësë de ra cusë ni, gunahia stubi ianglë naná

bietë de gube'e. Nápi' llëru'bë autoridá nu pudërë. Bëzianí ianglë lu guédchiliu con galërabsë'ë shtëhi' ²nu guni'i ianglë con bë fuertë:

—Hia gualú; hia gualú Babilonia, ciudá ru'bë nu bëaquin tubi lugar catë rëta' ra mëdzabë, lugar shtë espíritu mal nu lidchi ra ma dzabë nariasë, ra ma narná tushë mënë ³purquë ra mënë de grëtë' naciuni, na rall ziquë narzuu'dchi por tantë neguci nabë'në rall ciudá ni. Ra rëy shtë guédchiliu, bë'në rall adorar ra dzanë ídolo la'ni ciudá ni. Hia ra comerciante shtë guédchiliu, bëac rall ricu por ra cusë chulë nabë'në subrë parë ciudá ni.

⁴Iurní binia stubi bë naná ze'dë de gube'e. Guní'i':

—Gulë bëru'u ciudá ni, lë'ë të shmëna të parë gápëdi'i të partë juntë con duldë shtë mënë ni, nu adë guëzac zi të por plaguë naze'dë guëc ra mënë ni. ⁵Pues mënë ni bë'në rall zihani duldë, nu Dios bëagná ldu'i nu napë quë gúni' cashtigu lë'ë rall. ⁶Lë'ë të ianglë, gulë bédë'ë mizme pagu lo quë bédë'ë rall cua'a sa' rall nu gulë quilli hashtë chupë tantë mal según lo quë nabë'në rall. Gulë bë'në tratë lë'ë rall chupë vësë más dushë quë bë'në rall tratë sa' rall. ⁷Catë lë'ë rall guquërelde rall con tantë galëljüjë, nu catë bë'në rall nadchini, gulë bë'në medir galërzac zi nu dudurë parë lë'ë rall purquë nadchini guni'i rall: “Ndë'ë zúbëga'ahia cumë ziquë tubi reina. Nádia'a viudë nu adë sac zidia'a.”

⁸Por ni mizme dzë guëdchini ra plaguë guëc ciudá ni. Guëdchini

galguti nu galërzac zi nu gubini. Lë'ë ciudá tsequi con be'lë purquë llëru'bë pudërë napë Dadë Dios; bë'në më condenar ciudá ni.

⁹Ra rëy shtë guédchiliu naná bëzullibi lu ra dzanë ídolo con mënë shtë ciudá, nu bëuu' ldu'u rall galëljüjë shtë ciudá; gu'në rall nu cushtiá rall iurë guená rall lu gushë shtë ciudá narie'qui. ¹⁰Guëa'në rall zitu purquë guëdzëbë rall cashtigu ni. Nu guëni'i rall:

—Prubi ciudá Babilonia ru'bë nu pudërusë. Tubsë mumëntë bédchini cashtigu dushë guëc ciudá.

¹¹Ra comerciante shtë guédchiliu nu zac lë'ë rall gu'në rall nu cushtiá rall por lë'ë ciudá ni nagualú purquë hia nídi'i chu si'i ra cusë nanua'a rall. ¹²Nua'a rall orë, bédchichi, guë'ë nalasac, perlas, lari fini, lari sädë nu lari color moradë nu lari color llini; nu zac nua'a rall hiaguë fini naná rldia'a nashi. Nua'a rall cusë za'quë nanactsa'u marfil. Nua'a rall hiaguë nalasac, gui'bë shlí'echi; nua'a rall gui'bë nalasac; nua'a rall guë'ë iarë. ¹³Nua'a rall canëlë nu cusë nanutsë ziquë naná rldia'a nashi. Nua'a rall gushialë, mirra, perfume, vini, sëiti, harinë fini nu trigu; nua'a rall ma narua'a carguë. Nua'a rall lli'li, guay, guërrëde shtë guay, nu nua'a rall mënë nanápëdi'i libertá parë guëtuu' rall mënë ni. ¹⁴Guni'i ra comerciante ni shcuendë ciudá ni:

—Hiadë nápëdi'i të ra cusë narzebi ldu'u të, cusë narëuu' ldu'u të. Iurní guniti të parë siemprë grëtë' galëricu nu galëljüjë nanapë të.

¹⁵Ra comerciante, ra naná guc ricu por tantë bëtuu' rall nu guzi'i

rall la'ni ciudá ni, guëa'në rall
zitu por galërdzëbë shtë cashtigu
ni. Gu'në rall nu cushtiá rall nu
¹⁶guni'i rall:

—Prubi de lë'ë ciudá ru'bë rë'. Nal
cumë tubi na'a nanacu lari za'quë
color moradë nu llni. Zutsá'ul
con orë nu guë'ë nalasac nu perla
¹⁷perë tubsë mumëntë gualú grë
galëricu ni.

Grë ra capitán shtë barcu nu ra
pasajërë nu ra marinërë nu grë ra
narunë dchi'ni lu nisëdu'u, guëa'në
rall zitu de ciudá ni. ¹⁸Iurë lë'ë
rall guená rall gushë shtë ciudá
narie'qui, cushtiá rall; guëni'i rall:

—Adë guëdzélëdi'i stubi ciudá
ziquë ciudá ru'bë rë'.

¹⁹Iurní bëtia'a rall guiu'u guëc
rall; gu'në rall nu cushtiá rall:

—Prubi de lë'ë ciudá ru'bë rë'. Con
galëricu shtë ciudá grë ra nanapë
barcu lu nisëdu'u, guc rall ricu;
perë iurne' tubsë mumëntë gualú
ciudá ni. Completamente bërëhin.

²⁰Perë gulë bëquitë ldu'u të
naquëbezë gube'le, lë'ë të poshtë
shtë më, lë'ë të naruadi'dzë shti'dzë
më, lë'ë të nabëzuné Dios almë shtë
të, purquë bë'në më cashtigu ciudá
ni. Bë'në më jushtisi por manërë
mal bë'në mënë shtë ciudá tratë lë'ë
të.

²¹Iurní tubi ianglë nanapë pudërë
ru'bë bëldísi' tubi guë'ë ziquë tubi
guë'ë naná rzua trigu; iurní bëtia'a
ianglë ni lë'ë guë'ë la'ni nisëdu'u nu
guni'i'i:

—Zndë'ë lë'ë Dios guëtia'a ciudá
Babilonia la'ni nisë. Nunquë jamás
guëbrídi'i guená mënë luhin.

²²Nunquë jamás guíniru'u mënë
lu nezë shtë ciudá musiquë shtë

arpa, nilë bédcha', nilë trompetë.
Adë guëdzéldëdi'iru'u ra narunë
ra dchi'ni, nu nilë tubi clasë muzë.
Adë guínidi'iru'u ruidë shtë molinë.
²³Hiadë gabtsé'ëdi'iru'u llni ladi
hiu'u shtë ciudá, ni cërë, ni lámpara,
nu jamás guínidi'iru'u të catë nanú
sa'a lidchi mënë. Zni gac aunquë
antsë ra comerciante shtë'nël guc
rall mënë nanapë pudërë, perë
bësiguël grété' naciuni con galbishi.

²⁴Pues ciudá ni na culpablë por
ra galguti shtë ra shmënë Dios
naruadi'dzë shti'dzë më, grë ra
nabëzuné Dios almë shtë rai', grë ra
naguti purquë guanaldë rai' shnezë
Jesús.

19 Despuësë de ra cusë rë',
binia bë fuertë shtë zihani
mënë naquëbezë lu gube'le. Guni'i
rai':

Aleluya, Dios Shtëáda'a nápi'
llëru'bë pudërë.

Sulë lë'ë më rac runë salvar.

Sulë lë'ë më runë tucarë
labansë shtë mënë,

²purquë lë'ë më quëhunë më
juzguë tubldí nu con verdá.

Pues bë'në më condenar lë'ë na'a
mal naná bëshi'ni guédchiliu
con mal vidë shtë'nëll.

Lë'ë më bëguëu' galguezë por
grété' ra cusë mal, por grë
galguti shtë ra nabë'në sirvë
lu Dios.

³Iurní bëabrí guni'i ra mënë:

—Aleluya. Lugar catë rie'qui na'a
ni, nunquë cuezë tsepi gushë parë
siemprë.

⁴Hia ra galdë bi tapë më guani'si
con ra tapë nanabani, bëzullibi rai'
lu guiu'u nu bë'në rai' adorar Dios
naná quëbezë lu trunë. Guni'i rai':

—Nia Dadë; aleluya.

⁵Iurní binia tubi bë nabëru'u ladë trunë ni. Guní'i':

Gulë bë'në alabar Dios shtëna'a, grétë' të naná quëhunë sirvë lu më.

Gulë gapë të respëti delantë lu më, lë'ë të naná humildë nu lë'ë të naná më nasac.

Sa'a shtë Lli'li

⁶Nu zac binia ziquë tubi bë shtë zihani mënë; nahin ziquë bë shtë zihani guëë'gu catë rzë nisë u ziquë nguzi'u fuertë. Guni'i' rai':

Aleluya purquë hia guzublú guë nibë'a Dadë Dios shtëna'a; napë më llëru'bë pudërë.

⁷Cha guëquitë ldu'u hia'a; cha guédápa'a lëgrë la'ni ldu'u hia'a, nu cha guédé'na'a alabar lë'ë më purquë hia bédchini iurë shtë sa'a shtë Lli'li.

Lë'ë tse'lë më na preparadë.

⁸Lë'ë na'a ni bédë'ë më permisi gácuhi' con lari fini nu limpi; rabtsë'ë lari ni.

Lari fini ni runë cuntienë ra vidë tubldí shtë shmënë Dios.

⁹Iurní guni'i' ianglë lua:

—Bëquë'ë di'dzë rë': "Dichusë na ra naná invitadë lu laní sa'a shtë Lli'li".

Nu zac guni'i' ianglë:

—Verdá nahin; di'dzë ni na di'dzë shtë Dios.

¹⁰Bëzullibia iurní delantë lu ianglë parë guna adorar lë'i', perë guni'i' ianglë lua:

—Adë rúnëdi'il zni'i' purquë nahia muzë shtë Dios cumë ziquë lë'ël, ziquë los de más béchil naná

quëhunë cumplir voluntá shtë më, ra narni'i' diza'quë shtë më. Sulë Dios bë'në adorar lë'i'.

Ra diza'quë naze'dë de Jesús na mizmë di'dzë nardë'ë Espírutu Santo parë ra muzë shtë më të guadi'idzë rai' diza'quë.

Tubi nadchi'bë guay naquichi

¹¹Iurní gunahia lu gube'e bëlla'lë; gunahia tubi guay naquichi. El quë nadchi'bë tēchi ma, bërulë Fiel nu Verdadero purquë náhi' justë iurë rnibé'ai' nu tubldí quëhúni' iurë tildinúhi' ra mënë. ¹²Slúhi' rabtsë'ë ziquë be'lë. Nuá'ai' guéqui' zihani corunë. Nu nápi' tubi lë naescritë sulamëntë lë'ë më runguë bë'a lë ni. ¹³Nacu më tubi lari nutsë con rënë. Lë më ni na Di'dzë shtë Dios.

¹⁴Nu zianaldë ra zihani suldadë shtë gube'e; nacu rai' lari lino fini naquichi nu limpi. Nu dchi'bë rai' tēchi guay naquichi. ¹⁵De rua' më bërú'u tubi spadë dushë parë gunë më gan lu ra mënë shtë naciuni të guë nibé'ai' lë'ë rall tubi manërë dushë. Gunë më cashtigu ziquë el quë narshi'i' uvë con guëáhi'. Gunë më të gu ra mënë vini shtë cashtigu purquë bēldé Dios pudërusë con lë'ë rall. ¹⁶Lu lari capë nu lu tēchi llibi më, naescritë tubi lēhi': "Rëy nanapë pudërë subrë grë ra rëy; Señor naná rnibë'a grë ra Señor".

¹⁷Lueguë gunahia lu tubi ianglë nazuldí lu ngubidzë. Guní'i' fuertë lu grë ra ma'ñi nariasë lu gube'e:

—Gulë gude'e nu gulë guëtëá sa' të parë shtse ru'bë shtë Dios

¹⁸të gau të belë shtë ra rëy, nu ra jëfë militari, ra nguiu valientë.

Gau të belë shtë ra guay con belë

shtë ra nadchi'bë ma; gau të belë shtë ra naná rnibë'a nu belë shtë ra naná bajo ordë shtë sa' rall nu belë ra mënë nalasac nu ra mënë nalasáquëdi'i.

¹⁹Iurní gunahia lu ma dushë; gunahia lu ra rëy shtë gué'dchiliu con ra suldadë shtë nē rall. Bëdëá ra parë tildinú rall cuntrë lë'ë nadchi'bë tëchi guay naquichi con ra suldadë shtë më ni. ²⁰Hía lë'ë ma dushë zia'a prësi juntë con profetë falsë naná bē'nē zihani sēni nu milagrë delantë lu ma dushë. Por milagrë nabē'nēll bēsiguë mēnē ni ra nabëdë'ë permisi parë gac escritë sēni shtë ma dushë, nu bē'nē rall adorar figurë shtë ma dushë. Lë'ë ma dushë con profetë falsë bëquëldí Dios lë'ë rall nabanigá rall la'ni lugar catë rëuldë con gui'i nu asufre. ²¹Hía los de más narianaldë tëchi ra mēnē ni, guti rall con spadë shtë më nadchi'bë tëchi guay. Bëru'u spadë rua' mēnē ni. Grëtë' ra ma'ñi bielë ra ma con belë shtë ra tēgulë ni.

Tubi mili izë

20 Despuësë gunahia lu tubi ianglë naná ze'dë de gube'e con tubi liahi shtë gabildi guí'a' ai'. Nu nuá'a' ai' tubi cadënë ru'bë. ²Lë'ë ianglë ni bëldi'bi lë'ë dragón, lë'ë serpientë nanabani dizdë guahietë, mizmë mëdzabë Satanás. Iurní bëquëdú ianglë lë'ë mëdzabë con cadënë por tubi mili izë. ³Bëquëldí ianglë lë'ë mëdzabë la'ni gabildi; nga'li bëtá'ui' lë'ëll. Nu bëquë'ëi' tubi sēgi rua' gabildi të parë adë guërú'udi'i Satanás nu adë guësiguëdi'ill ra naciuni hashtë tēdë

tubi mili izë. Despuësë de tubi mili izë, iurní napë quë lda'a mëdzabë por du'pë tiempë.

⁴Lueguë iurní gunahia ra trunë catë zubë ra nabē'nē recibir pudërë parë gunë rai' juzguë. Nu zac gunahia lu ra almë naná guriuguë ra guëc rai' purquë biadi'dzë rai' shti'dzë Dios; guc rai' testigu shtë Jesús. Lë'ë ra mēnē ni adë bē'nēdi'i rai' adorar lë'ë ma dushë, nilë figurë shtë ma. Nu adë bëdë'ëdi'i rai' permisi parë niac marcar luquë rai' u guia'a rai'. Gunahia de quë bëabrí guëbani rai' nu gunibë'a rai' con Jesucristo durantë tubi mili izë. ⁵Perë los de más ra tēgulë adë bëabrídi'i guëbani rai' sino quë hashtë despuësë tubi mili izë guc cumplir. Ndë'ë na primërë vësë guashtë ra tēgulë ladi ra tēgulë të gátidi'i rai' jamás. ⁶Guëquitë ldu'u ra mēnē ni nu guc ldai' rai' por Dios, mēnē nabëabrí guëbani stubi antsë ra mili izë. Nunquë jamás gati rai' stubi sino na rai' bëshuzi shtë Dios nu shtë Cristo. Nu guënbë'a rai' con lë'ë më por tubi mili izë.

⁷Iurë tēdë ra mili izë, iurní Satanás napë quë ldá'all catë nanull prësi. ⁸Nu guërú'ull të tsagsiguëll ra naciuni shtë gué'dchiliu. Guziá'all parë tsagsiguëll Gog nu Magog. Guëtëall ra suldadë shtë lugar ni parë guërru. Nalë zihani ra suldadë ni, ziquë iu'lli rua' nisëdu'u. ⁹Zni bërë'tsë rall catë naná shlatë shtë gué'dchiliu nu bëdëá rall alrededurë catë nanú ra shmënë Dios nu alrededurë ciudá narac shtu'u më. Perë Dios gunibë'ai' të parë guëdchini gui'i dizdë gube'e të parë guëza'i gui'i lë'ë rall; grë rall

guti. ¹⁰Lë'è mëdzabë naná bësigué lë'è mënë ni, bëquëldí Dios lë'ëll la'ni be'lë catë rie'qui con asufre, mizmä lugar ni nanú ma dushë nu profetë falsë. Nga'li sac zi rall dzë la gue'lë por guëdubi tiempë, nídí'i fin.

Trunë naquichi catë gunë më juzguë

¹¹Iurní gunahia tubi trunë naquichi nu gunahia lu më naquëbezë luhin. Delantë lu më gunitilú gué'dchiliu nu gube'e. Iurní bëdzélëdi'i ni tubi lugar parë lë'è narná hia'a iurne'. ¹²Iurní gunahia lu ra tēgulë, më ru'bë nu ra nalasáquëdi'i. Zuldí rai' delantë lu Dios. Iurní bëlla'lë ra librë nu zac stubi librë bëlla'lë, librë catë naescritë ra lë shtë mënë nanapë vidë sin fin. Hia lë'è ra tēgulë, Dios bë'në juzguë lë'è rai' según de lo quë nabë'në rai', según lo quë naná escritë la'ni librë ni. ¹³Lë'è nisëdu'u bë'në intriegu ra tēgulë naná guti lu nisë. Hia lugar shtë galguti, lugar catë bëga'chi ra tēgulë, bë'nin intriegu ra tēgulë nananú nga'li. Hia iurní Dios bë'në juzguë lë'è rai' cadë tubi rai' según lo quë nabë'nëll. ¹⁴Iurní galguti nu lugar catë bëga'chi ra tēgulë, Dios bëquëldí lë'è rahin la'ni lugar catë rie'qui con be'lë. Lugar ni nalë Galguti Segundë. ¹⁵Nga'li bëquëldí Dios grëtë' ra mënë nanádi'i escritë lë rai' la'ni librë. Librë ni rni'i chull napë vidë sin fin nu chu nádi'i salvar.

Gué'dchiliu cubi nu gube'e cubi

21 Despuësë gunahia lu tubi gube'e cubi nu

tubi gué'dchiliu cubi purquë lë'è primëre gube'e nu primëre gué'dchiliu hia gunitilú. Hia nídí'i nisëdu'u. ²Na Juan, gunahia lu tubi lugar catë nádi'i maldá; lë lugar ni na Jerusalén cubi naná ze'dë de gube'e catë quëbezë Dios. Ciudad ni nalë nasa'a ziquë tubi lliguëna'a nanacu shábi' parë guëtse'ai'. ³Nu binia tubi bë fuertë naná guni'i dizdë lu gube'e:

—Guná, Dios quëréldënúhi' con ra nguui. Guëbaninú më lë'è rai'; nu lë'è rai' na ziquë gué'dchi shtë Dios. Cuezënú më lë'è rai'. Na më Dios shtë rai' de verdá. ⁴Dios guëcuë'dchi' grëtë' nisë narru'u lu ra mënë ni. Hia iurní jamás gati rai'. Gú'nëdi'i rai'; adë tsádi'i ldu'u rai', nu gápëdi'i rai' dulurë purquë grëtë' ra nagu' antsë hia lë'è ni gualú.

⁵Iurní el quë naná quëbezë lu trunë guni'i:

—Guná quëhuntsa'ua nacubi grëtë' ra cusë.

Nu zac guní'i' lua:

—Bëquë'ë di'dzë rë' purquë verdá nahin nu quëhuna cumplir shti'dza.

⁶Despuësë de ni, guni'i më lua:

—Hia grëtë' guc. Na nahia principi nu nahia fin ziquë lëtrë A nu Z. El quë nanapë garbidchi, na guënehia ndigá nisë gu mënë ni. Nisë ni na vidë sin fin. ⁷El quë nangunë gan lu cusë mal, gúnëll recibir grëtë' ndë'ë ziquë herenci. Gaca Dios shtë mënë ni nu lë'è rai' gac rai' shinia. ⁸Perë en cuantë ra nanápëdi'i valurë parë guëquebi rall na rall shmëna, ra nanabani mal, ra narguini mënë, ra nabani ziquë mbecu, grë ra narunë crear galbëlliú, grëtë' ra narunë adorar cusë naruntsa'u guia'a

mënë, grétë' nabishi ra; grë mënë ni runë tucarë tsa rall la'ni lugar catë rie'qui con be'llë nu asufre. Nga'li gati rall parë siembrë, adë níd'i' fin.

Jerusalén cubi

⁹Ra gadchi ianglë ni nua'a rai' gadchi copë narunë significar gadchi plagüë dushë nanapë quë guëdchini. Guni'i tubi ianglë lua: —Gude'e të guëluá'ahia lë'ël lu naná guëtsë'a, lë'ë tse'lë shtë më nabërlulé Lli'li. ¹⁰Bë'në Espiritu Santo të gunahia stubi cusë. Tubi ianglë bia'a na guëc dani ru'bë. Bëlu'a ianglë na tubi ciudá ru'bë nalë Jerusalén Santu naná ze'dë de gube'e catë quëbezë Dios. ¹¹Ciudá ni rabtsë'ë con mizmë llni nu pudërë shtë Dios. Rabtsë'ëin ziquë tubi guë'ë namás lasac, ziquë guë'ë jaspe. Rlua'ain ziquë vidrio. ¹²Alrededurë ciudá ni nanú tubi lu' ru'bë nu llëduni. Napë lu' ni chi'bë chupë puertë. Tubi ianglë zuga'a rua' cadë puertë. Lu ra puertë ni naescritë lë shtë chi'bë chupë grupë shtë ra mënë israelitë. ¹³Nanú tsunë puertë nezë guia'a, tsunë puertë ladë nortë, tsunë puertë ladë sur, nu tsunë puertë ladë nezë guetë. ¹⁴Hia lu' shtë ciudá ni napin chi'bë chupë guë'ë naná ziquë cimientë shtë lu'; hia naescritë lu guë'ë ni ra lë shtë chi'bë chupë poshtë shtë Jesús, el quë nabërlulé Lli'li.

¹⁵Lë'ë ianglë naná quëadi'dzënú na, nua'a tubi varë orë parë guërë'shë ciudá, ra puertë nu lu' shtë ciudá. ¹⁶Lë'ë ciudá nahin cuadradë; de largüë nu igual de ancho. Lë'ë ianglë ni bërë'shi' ciudá con varë nanuá'ai'. Bërë'shë ianglë

naná chupë mili chupë gahiu'a kilómetros de largüë, de alto, nu de ancho; igual na guézä ladë shtë ciudá. ¹⁷Lueguë bërë'shë ianglë naná lu' shtë ciudá; nabishin naná sesenta con tapë metros según medidë nanua'a ianglë.

¹⁸Lë'ë lu' ni nactsá'uhin de guë'ë jaspe nu lë'ë ciudá nactsá'uhin con purë orë; rlua'ain ziquë vidrio naná limpi. ¹⁹Ra chi'bë chupë cimientë shtë lu', dzutsá'uhin con grë clasë guë'ë nalasac. Primërë cimientë na guë'ë jaspe; hia naná segundë na guë'ë safiro; hia tecërë na guë'ë ágata; cuartë na guë'ë esmeralda; ²⁰Quintë na guë'ë ónice; sexta na guë'ë cornalina; hia séptima na guë'ë crisólito; lë'ë octavë na guë'ë berilo; lë'ë noveno na guë'ë topacio; lë'ë décima na guë'ë crisoprasa; lë'ë undécima na guë'ë jacinto; nu duodécima na guë'ë amatista. ²¹Ra chi'bë chupë puertë shtë ciudá nactsa'u guë'ë perla, cadë tubi puertë na tubsë guë'ë perla. Lë'ë nezë principal shtë ciudá ni nactsa'u de purë orë. Rlua'ain ziquë vidrio purë.

²²Adë gunádia'a iádu'u shtë ciudá ni purquë mizmë lë'ë Dadë Dios narnibë'a grétë' cusë nu el quë nabërlulé Lli'li, na rai' iádu'u shtë ciudá ni. ²³Hia lë'ë ciudá rquí'nidi'i llni shtë ngubidzë, nilë llni shtë mbehu parë guëzianí purquë mizmë llni shtë Dios nu zac llni shtë Lli'li quëgzianí ladi guë'dchi. ²⁴Ra naciuni naná guc ra salvar, së rai' lu llni shtë ciudá nu ra rëy shtë guë'dchiliu gue'dënú rai' grë pudërë nu hunurë shtë rai' parë gunë rai' intriegu ni lu më. ²⁵Ra puertë shtë

ciudadá jamás adë gué'audi'in dzë
la gue'lë purquë guídëdi'i gue'lë.
²⁶Nga'li ra mënë shtë grë naciuni
gue'dënú rall hunurë nu cusë ru'bë
parë ciudadá ni. ²⁷Perë nunquë adë
tsutëdi'i cusë nanádi'i limpi la'ni
ciudadá; adë tsutëdi'i el quë naná mal,
nilë el quë narná tushë lu sáhi', nilë
el quë narguguë sáhi'. Sulë ra mënë
tsutë nga'li, ra nardzelë lë rai' la'ni
librë narni'i chu gac salvar. Pues
lë'ë Lli'li nápi' librë ni.

22 Iurní lë'ë ianglë bëluá'ai'
tubi guëë'gu catë nanú
nisë limpi. Nisë ni rne'e vidë sin
fin. Rlua'ain clarë ziquë vidrio, nu
bëru'u nisë ni dizdë lu trunë catë
quëbezë Dios nu catë quëbezë Lli'li.
²Hia guërudë nezë principal shtë
ciudadá nu cadë ladë shtë guëë'gu
ni, riaru'bë tubi hiaguë narne'e
vidë sin fin. Hiaguë ni bédë'ë tubi
cusechë chi'bë chupë vësë tubi
izë; rne'ein nashi cadë mbehu nu
ndiaguë shtë hiaguë ni rllui' parë
gunëac ra mënë shtë ra naciuni.
³Ndë nídi'i ni tubi cusë narzac
zi por galëcashtigu shtë më. Lë'ë
trunë catë quëbezë më nu catë
quëbezë Lli'li, zuga'a la'ni ciudadá ni;
hia lë'ë muzë shtë Dios quëhunë rai'
adorar lë'i'. ⁴Frentë guená rai' lu
më iurní nu nua'a rai' lë më luquë
rai'. ⁵Nga'li adë tsúdi'iru'u gue'lë.
Ra naquërelde nga'li adë rquí'nidi'i
llni shtë lámpara, ni por llni shtë
ngubidzë purquë mizmë Dios,
Shtáda'a, guëzianí më lu ra mënë ni.
Ndë guëni'bë'a rai' por grëtë' tiempë.

Hia guëlladchi iurë
guëabrí Jesucristo

⁶Lueguë lë'ë ianglë guni'i lua:

—Di'dzë rë' na verdá nu nasegurë
gunë më cumplir rahin. Lë'ë Dadë
Dios shtë ra nabiadi'dzë shti'dzë më,
mizmë më ni bëshé'ldi' ianglë parë
guëluá'ai' lu muzë shtë më grëtë' lo
quë nagac lueguë.

Guni'i Jesús:

⁷—Gueda lueguë.

Guëquitë ldu'u el quë naná runë
cuendë ra di'dzë naná escritë la'ni
librë rë'.

⁸Na Juan, binia nu gunahia grëtë'
ra cusë rë'. Hia despuësë binia
nu gunahia, iurní bëzullibia guëa'
ianglë, el quë nabëlua'a na ra cusë
ni. Guc shtua'a guna adorar lë'i'

⁹Perë ianglë guni'i lua:

—Adë rúnëdi'il zni'i purquë nahia
tubi muzë shtë Dios igual ziquë lë'ël,
ziquë ra sa'l narni'inú diza'quë lu
ra mënë nu ziquë ra narunë cuendë
ra di'dzë naná escritë ndë'ë. Bë'në
adorar Dios.

¹⁰Nu guni'i ianglë lua:

—Adë rca'chi ldú'udi'il ra di'dzë
rë' naná escritë la'ni librë rë'
purquë hia lë'ë tiempë ziagla'guë
nagac cumplirin. ¹¹Dzë ni ra mënë
naquëhunë mal, tsagla'guë gunë rall
mal. Ra naná më mal tsagla'guë gac
rall më mal; el quë naná më za'quë
lu Dios, tsagla'guë gac rall më za'quë
lu më; el quë naná santu delantë lu
më, tsagla'guë gáqui' santu.

Guni'i Jesús:

¹²—Zni nahin; lueguë guelda.

Guelde'núa tubi premi ca'a tē según
lo quë naquëhunë tē. ¹³Nahia ziquë
ra letrë A nu Z; nahia principi nu
nahia fin shtë grë ra cusë. Más
antsë gurështë guë'dchiliu, nabania
iurní nu despuësë tsalú guë'dchiliu
todavía nabania.

¹⁴Guèquitè ldu'u ra naquèhunè
cumplir voluntá shtë më të gapè
rai' derechè gau rai' nashi shtë
hiaguè narne'e vidè sin fin. Zni
gac parè tsuté mènè ni rua' puertè
shtë ciudá. ¹⁵Perè grètè' ra naná
mal, ra naquègsiguè sa' rall, ra
narunè galèbèlliú, ra narquénú sa'
rall, grètè' ra narguini mènè, grètè'
ra narunè adorar cusè naractsa'u
guia'a mènè nu grètè' ra narèuu'
ldu'u ra cusè enga'ni u ruadi'dzè rall
bishi, guèa'nè rall fuèrè ciudá.

¹⁶—Na Jesús, bèshe'lda ianglè
shtëna parè guèquébi' nu guèní'i'
grè ra di'dzè rè' lu ra grupè shtë
shmènè Dios. Nahia el què nabèdè'è
vidè parè rëy David nu nahia llèbni'
shtëhi'. Nahia ziquè mbelègui'i
Plojè narabtsè'è rsili.

¹⁷Lè'è Espíritu Santo rni'i:

—Gude'e.

Lè'è tse'lè Lli'li rni'i:

—Gude'e.

El què narquè diaguè shti'dza
rni'i:

—Gude'e.

El què narbidchi si rac shtu'u
gu nisè, gude'e lua parè gull nisè
narne'e vidè sin fin. Rne'e më nisè
ni ndigá.

¹⁸Quèhuna testificar de què
cualquier mènè narini di'dzè
naná escritè la'ni librè rè', si talè
guètu'ni nguii más cusè, Dios
gúni' cashtigu nguii ni con plaguè
naze'dè según naescritè ndè'è. ¹⁹Si
talè chu tubi nguii guèdchisull
tubi di'dzè shtë Dios naná escritè
la'ni librè rè', Dios guèti'i lè nguii
ni la'ni librè narni'i chu na salvar.
Guèdchisú më derechè parè adè
tsutédi'i nguii ni la'ni ciudá santu
con grè ra bendición naná escritè
la'ni librè rè'.

²⁰El què narquebi ra cusè rè'
rni'i:

—Lueguè guela.

Nia, Dadè Jesús, gude'e.

²¹Na Juan, rnia'a lu tè; rac shtua'a
gunè ldai' Dadè Jesucristo lè'è tè nu
cuezènúhi' lè'è tè. Amén.